


黃文獻集補附遺錄

八





黃文獻集

附錄補遺

(八)

黃潛撰

中華民國二十五年六月初版

那

黃

撰 者

黃

潛

王雲五主編
叢書集成初編

文獻附錄
遺補錄八冊

集

發行人

王

上海河南路
雲

五

印刷所

商

上海河南路
務印書館

館

發行所

商

上海及各埠
務印書館

館

黃文獻公集卷之十一

桂隱先生小傳

桂隱先生黃府君諱夢炎字子暘潛之曾祖。按黃氏家乘云夢炎曾祖中輔王崇炳金華徵獻略亦承其

曾祖知此傳爲文獻所作也今特正之

其先自浦江來徙考諱中輔字槐卿尙氣節不務爲苟合紹興中秦檜柄國和議既

成日使士大夫歌誦太平中興之美聞言其姦者輒捕殺之衆咸縮頸獨奮不顧作樂府題太平樓有快磨三尺欲斬佞人頭之語幾蹈不測之禍晚歲屏居山園號細高名其齋曰轉拙檜死久之轉運使乃上其行義於朝將授以官未命而卒有類稿十卷府君博學善爲文淳祐末登進士第後陞入京湖制幕以掌典故准備差遣平反盜公庫銀冤獄得釋者數百人入淮東制幕由幹辦外改陞主管機宜文字建議獨放屯租四千七百餘石於是兩司亦盡捐其屯租爲米麥十七萬六千餘石錢會四十二萬二千餘貫邊民之被兵者得以安心復業由武學教諭出通判平江府在官未及朞擢節浮蠹得錢十七萬緡以代民田租白免淮西總領累世所索無名錢一萬五千餘緡民力已甦吳丞相潛去國言者以爲常受丞和兄辟舉遂奉祠而歸秩滿添差淮南東路制置司參議官提刑使者關奉閫檄決四郡擊囚人稱明允咸淳初召除司農寺丞書擬內藏庫綱解斯時內帑空乏而支用浩繁大徵宿負於列郡哀數多而期會迫急因輪對力言其弊略與潼川憲司歲額銀二萬六千餘兩照寶祐初元則當起五百兩歲額一萬一

千餘匹。照寶祐初元。則當起一千五百匹。乞加考訂。爲之通變。且進減浮費之請。奉宴私之戒。度宗嘉納。令內外諸司條具申省。以聞。除樞密院編修官。遷太常丞。歷兼右司。及吏部之尙右郎官。戶部之左官曹郎。皆仍兼編修。先是時宰欲授寘言路。而奉行其風指。俾客微示以意。巽謝卻之。故雖久在朝行。不過庶僚。乞補一郡。亦靳弗予。引年以朝請大夫致仕。扁所居堂曰桂隱。室曰澹齋。有詩文雜著十卷。追紀淮南漣海兩廣蜀峽荆襄沅靖思播諸蠻之形便阨塞。與凡戰守之事宜。爲筆記一卷。宋濂題桂隱遺文後云。十二篇。其曾孫翰林侍講學士文獻公潛所鈔。濂嘗受業公門。見公追念先德。日蒐墜逸。手錄成編。此蓋其藁本也。濂之學。子同里俞生恂。購得之。請識其後。先生諱夢炎。字子暘。烏傷人。博學工文辭。擢宋淳祐十年進士第。官至朝散大夫。行太常丞。兼樞密院編修官。兼權左曹郎官。以朝請大夫致仕。其子能文。入仕之詳。人類能道之。至於志節之卓。政事之美。則鮮有知之者也。先生爲人不苟。合忠君憂國之意。愧不不忘。故於論對之際。數以修君德謹邊事爲戒。權臣才之欲實諸言路。使奉行其風指。先生力辭不就。此固足以增夫名教之重。然其仁民之政。尤不可以一二數在。淮東制幕。建議蠲放屯田租。四千七百餘石。通判蘇州。擢節浮費。獲錢十七萬緡。以代民租。嗚呼。先生可謂偉特不羣之士矣。非公之去才。碩學以繼其後。又惡能世濟其美。也耶。今去公之歿已二十二年。公之尚德尊祖之意。猶煜然見於觚翰間。覽是編者。其有不油然而興感者乎。非但玩其字畫之妙而已也。拾遺六篇。公之高第弟子翰林待制王君禕。手鈔從公命也。恂并裝褫以附其後云。

祁門李君墓誌銘

君諱與口。字子常。姓李氏。其先唐宗室。廣明之亂。避地東南。至歙之黃墩。兄弟三人。析爲三族。居祁門。字谿之槃田者曰鴻。君始祖也。十世祖秀。有子六人。六子而下。兩世合百有二人。後益蕃衍。遂爲其鄉之望。君曾祖諱悛。祖諱聖任。父諱如深。因所居以爲號曰槃隱。宋末干戈未定之際。里人皆賴以安。母熊氏。君於兄弟五人中最幼。熊氏出也。生而秀異。既長。躬行孝悌。侍父疾。衣不解帶者三年。父沒四年。而母亦歿。

居二親之喪。動必以禮。俚俗誕妄不經之說。悉屏去之。葺先廬以奉其長兄。而別爲諸兄築室。乃依山結屋而居焉。長兄官池之青陽。往省其疾。越翌日。兄卒。其長子甫四歲。次未晬。奉寡嫂扶護其喪以歸。次兄繼卒。而兩庶兄亦卒。爲經紀其家事。曾無彼此之間。祖墓世遠多蕪廢。率族人訪求而表樹之。割己田若干畝。立祠於十世祖墓。而刻其譜系。陷寘壁間。族人有子孫貧乏徙他郡。而人竊賣其墓地者。有夫婦俱死。子幼。而人竊賣其田土者。悉爲盡力以復其舊。外舅姑歿。撫其二子至於成人。又皆死。爲立後而葬焉。諸姊來寧而沒者。則爲治喪而育其子。嫁其女。從夫遠宦而老且病者。則迎歸而爲其子納婦。俾職奉養。夫與子俱亡而無依者。生則養之。死則葬焉。其篤於倫理類如此。君與人交。無親疎各盡其情。然剛直尙氣節。臨事果敢。歲饑。民相率盜取人粟。長吏庸孱畏憚。託故避去。君以爲稍緩。將滋蔓而爲亂。奮身勇往。擒其首惡。餘黨皆駭散。因出所儲以賑其不能自食者。人尤以是稱之。所居有澗水出兩山間。架石梁其上。以便行者。暇日則治東園。蒔花卉。作亭其中。而於其外疏泉爲池。構屋其上。乃日與賓客觴詠相娛樂。不知老之將至也。君平生最留意於大學衍義之書。蓋有志於致君澤民之事矣。慨念兄弟。惟己獨存。不忍遠去其親。暨親終服闋。遂無復仕進意。將終前一歲。語其子曰。爲人子者。孰無雨露之思。我旦夕且死。其割田二十畝。歲取所入給汝祖墓。祭自汝祖而上。歲時展省。不可廢也。越明年。春分家祭。君沐浴更衣。饋薦拜跪如禮。祭畢而飲福。至三爵。卽命徹去。若有不樂之色。坐至夜分。左右請少休。乃入就寢。席未溫而形神已離。君生於至元二十九年正月甲寅。卒於至正七年二月某甲子。享年五十有六。娶吳氏。有賢

行。後君五月卒。子男一人曰元孫。男三人。纘、綽、總。女四人。以某年某月某日葬於同里石壁心田之原。君初延致趙先生、王先生。而與爲師友。旣又聞滕先生、會朱陸之學。而得其同。時君年已四十。率朋從往就講習焉。建閣藏書。將增廣以爲義塾。志雖弗遂。然與君遊。而接聞其師友之緒論者。處則以善其身。出則能以才自見。君未始有德色也。君旣葬。宿昔朋遊之士。念之不忘。於是黃君璣以狀來請銘。予衰病之餘。久疏筆研。顧念其舉也。以義。請也。以禮。不得卒辭。銘曰。

李氏在唐。國之近屬。散處東南。爲三大族。君生其時。不行而藏。仁興於家。善遷於鄉。詩書之澤。覃及士裔。是亦爲政。豈必在位。不居其功。以遺後人。孰爲可徵。石有刻文。

體仁守正宏道法師金君碑銘

吳之長洲。有爲老子之學者。曰金君諱善信。字實之。家故儒也。曾大父曰球。大父曰晁。父曰煥。漳州路龍谿縣尹。母沈氏。顧氏。龍谿之墓。故翰林侍講學士揭公實爲之銘。君幼凝靜。少長好虛無之說。欲辭父去母而求師。父母不可。授以家事。而羈縻之。君應酬少閒。輒取老子書反覆玩味。久而曰。老子之教。初不必毀形絕世。若今人之爲也。吾黨如蓮花生汙穢。外接世緣。內無所構鬪。何必去父母哉。旣止不行。且納婦有子矣。乃曰。父母留我者。我無不盡其責。古之至人。雖不必草衣而木食。巖棲而穴處。然學必有師。我將從有道者。就正焉。時元妙觀有張雷師。生不識錢。數能以符篆捕逐鬼神。君甚敬之。由是冠其冠而爲之執弟子禮。已而聞莫先生洞一者。嗜酒。醉輒詬罵人。雖王公不避。時時呼雲役雷。狎褻如兒戲。然君知其

有道者。則延至而尊事之。有所折辱。未嘗爲動色。或毀其所甚愛之物。亦不以爲意。先生知君信之篤。悉授以不傳之祕。他弟子不得者。君盡得之。遂建仁壽觀於城東北隅。日與其徒研覆妙旨。凡旁門小道。力排斥不少置。其言以爲心神至虛。無所汨沒。氣定光出。諸陰銷盡。諸陽自集。蓋有形者陰。無形者陽。陽益勝陰。氣益調精。我得清淨。去道無難矣。知之不親。見之不明。枯槁於山林何益乎。蓋其造道本末可見者如此。君初爲子弟時。無私蓄。旣壯。能使貲倍其舊。鄉里有糾紛不可解。輒爲揣摩。洞見底裏。類使之以自退。不爭取勝。遇時之名流。必加敬禮。有不給則周之。未嘗務遺世獨立以爲高。而其襟度特爲冲曠。闢一室。植桂樹若干本於其前。題曰桂軒。列一二古圖畫。徜徉其中。飄飄焉神仙人也。故賢士大夫多樂與之游。君年雖高。而視聽步履如強壯。一日呼左右謂曰。吾死矣。遂奄然而逝。非真有所得。惡能處生死之際若是哉。君生於宋咸淳九年十二月十一日。卒於今至順二年二月一日。年五十有九。以其年三月某日。奉道蛻葬武邱鄉半塘之原。君所自營也。君妻溫氏。事舅姑克盡婦道。教育其子若女。克盡母道。人莫不稱之。子三人。大亨。大振。大謙。惟大謙爲溫氏出。女四人。孫男女合若干人。葬後十七年。大謙始以建安陳方之狀來徵銘。昔老子嘗爲周柱下史。周之舊典禮經。無不知之。非棄絕人倫者也。至其以無爲清淨爲教。漢人用之。而天下以治。豈無益之學哉。老子遠矣。今道家者流。所宗漢天師張氏。旣舉賢良方正。直言極諫。其子若孫。或徵爲黃門侍郎。或辟爲丞相掾。祚允相承。逮今千餘歲不絕。有能遵其規範。無廢人間事。而有以究夫道之所存。不亦善學老子者乎。是可銘也已。始君受知嗣天師留國公。起爲廣德路道錄。

仍提點仁壽觀。界之號曰體仁。守正宏道法師。且以聞於朝。再下璽書。爲之加護。予旣備著君之道。至於出處之大概。亦不得而略也。銘曰。

老子有云。修之於家。其德有餘。歷世旣久。夔訛踵僞。寢述厥初。歸潔其身。長往不返。木石與居。有美一人。清風峻標。列仙之儒。養生有道。不斷外緣。神明內腴。謂人一心。無撓無雜。漠然冲虛。滌除元覽。抱一不二。方與道俱。惟是所存。久而愈晰。百世不渝。有崇斯邱。表以石章。過者式諸。此首見宋文憲集。稱代黃侍講。作按集中鄒府君墓誌銘。見宋文憲集。王判官墓誌銘。見王忠文集。則此碑銘宋王二公。亦必編入集中。殆後人以道教而刪之耳。今增入。

題王雪龕詩下方

雪龕王公詩二章。章四句。爲鄭氏義門作。鄭氏自睦徙婺之浦江。聚族而居者九世。中書旣表其所居曰義門。且復其力役。令無有所與。公以至正四年春閏二月丙寅。持部使者節。分按至浦江。問鄭氏之長其家者爲誰。吏以大和對。時大和年逾八十。公欲延見而重於招致之。乃命卽家存問。而進其羣子姓。詢以家規之詳。委曲褒諭。仍戒有司。拊循而勿擾。明日。又俾縣主簿函詩往遺焉。鄉人咸爲之感動。太息不已。大和圖侈公賜。昭示永久。爰刻其詩於石。屬潛志諸下方。潛伏讀先儒程子釋皇皇者華之詩。有曰。天子遣使四方。以觀省風俗。采察善惡。訪問疾苦。宣道化於天下。下國蒙被聲教。是以光華也。公由臺閣近臣。出將使指。得一善不啻若己有。形於詠歎。樹之風聲。使屬部之內聞者。莫不歆慕而知勸。將見比屋之民。無非可封之俗。其光華所及遠矣。豈止鄭氏一門而已哉。公之先大夫祕書少監東巖先生。以文章家知

名當世。過庭聞詩。蓋有自來。潛不敢妄。真品評。獨取夫可以厚人倫。美教化。移風俗者。而申其義如此。公名楚鼈。字元戴。家於秦山之麓。今以朝列大夫僉瀾東海右道肅政廉訪司事云。

記居士公樂府

右居士公和東坡百字令。茗溪胡仔所編草堂詩餘評曰。東坡赤壁詞。語意高妙。真古今絕唱。近時有人。和此詞。題於郵亭壁間。不著姓名。語雖粗豪。亦氣槩可喜。潛以家集較之。不同者三十九字。家集蓋近歲。族人訪求編入。而茗溪則得於當時壁間所題。然亦間有舛誤。而不可通者。乃傳刻之訛也。今悉以家集訂定焉。百字令。即念奴嬌。亦稱爲鷓鴣。江月草堂詩餘載和詞云。炎精中否。數人材委靡。都無英物。戎馬長中興。香君神武。小曾孫。周發海岳。封疆俱效職。狂虜會須灰滅。翠羽南巡。叩闕無路。徒有衝冠髮。孤忠耿耿。人材委靡。都無英物。胡虜長驅。三犯闕。誰作連城壁。萬國奔騰。兩宮幽陷。此恨何時雪。草廬三顧。豈無高臥豪傑。天心建我中興。吾皇神武。踵曾孫。周發海岳。封疆俱效職。狂虜會須灰滅。翠羽南巡。叩闕無路。徒有衝冠髮。孤忠耿耿。語徒有衝冠髮。天心建我中興。吾皇神武。踵曾孫。周發海岳。封疆俱效職。狂虜會須灰滅。翠羽南巡。叩闕無路。徒有衝冠髮。孤忠耿耿。問所題非一處耶。抑夙曾往來耶。居士名較前首不同者三十三字。若溪錄自壁間。不應存有別本。豈夫歌誦太平中興之美。居士作滿庭芳樂府題太平樓云。灑血爲詞。披肝作紙。片言誰讓。千秋快磨三尺。不封侯。奈伯也。自恨草茅無路。望九重。如在瀛洲。與長嘆。無言耿耿。空抱濟時憂。休言誰讓。千秋快磨三尺。復出此與壁間詞氣格相近。文獻齋孫簡庭手家乘以示。幸獲觀此。佚篇亟錄之。居士之詞。沈埋七百餘年。一旦氏名炳然。紙上。真非偶然。草堂詩餘見於馬氏經籍考。已

鳳凰山禪宗大報國寺記

宋度宗咸淳十年。是時宋未亡。據此記寺實建於至元二十一年。梵志誤大新即記中之大誤也。

至元二十一年有旨卽杭州鳳凰山之行宮建大寺五分宗以闡化其傳菩提達摩之學者賜號禪宗大報國寺乘法力以暢皇威宣天休以隆國勢也。按胡僧楊璉真伽卽宋故內建五寺曰興元曰報國曰般若華菴餘俱不存見仁和尚志比邱妙齊承語開山朝廷旣授以田若干畝而獨其稅賦齊復置官興莊田若干畝而皆用

日益豐歷歲滋久寢就衰削延祐六年不戒於火寺盡廢其明年江浙行中書省左丞相脫歡答剌罕領行宣政院事擇可任興復之寄者得大訴以爲住持聚貨食召匠傭斥基址簡材甃將諏日以庀事首令善於宮宅地形之術者測景辨方審其面勢寺故東向易稍近南作佛殿法堂丈室山門後負立壁前瞰奔濤茂松美竹蔽虧左右位置適宜而山川爲之改觀飛翠溼紅侵霄映地棟宇之雄麗亦昔所無刻雕藻繪像飾有嚴華簾鼓鐘列置如式莊田奪於豪民則白之有司而故疆畢歸泰定二年訴遷中天竺法明來補其處土木之事悉委於徧繼程督勸相徧獨以身親之雲堂蒙堂衆寮兩廡旣成而牀第臥具井園春禮之屬一無所缺至正四年今住持正達實來其明年造鐘經兩樓而叢林之規制大備自始役至訖功凡十六寒暑其爲費大率取諸經用之羨財而合衆緣以相其力之所不給狀稱始創寺時剗池得斷石乃安國羅漢院碑相傳卽其故址異時以院爲行宮而今復爲寺殆非偶然按宋史及臨安志行宮本杭之州治其徙安國羅漢之類於相國西井在建行宮後五十有五年與狀所載不能盡合姑附見之以廣異聞焉。元史百官志宣政院秩從一品掌釋教僧徒及吐蕃之境而隸治之其用人則自爲選其爲宣政殿之故更名宣政院行宣政院元統二年正月革罷廣教總管府一十六處置行宣政院於杭州

上天竺寺觀音殿記

杭之上天竺山廣大靈感觀音教寺新作大殿成。住山慧日屬某記之。按郡志。石晉時。僧翊結庵茲山。有瑞光發於前澗。就祝得奇木。募善工刻爲觀音大士像。會僧勳自洛陽持舍利來冥頂中。妙相以具。吳越錢氏易庵爲院。宋天聖初。乃徙今所。卽瑞光所發處也。嘉祐治平間。賜號靈感。遂以爲院額。淳熙初。易院爲寺。淳祐末。又加以廣大之號。皇元尊象法而尙教乘。天竺實居東南列刹之首。至元之三年。寺燬於災。惟聖像巍然獨存。諸珍異服器亦無損毫末。人以爲是有神靈陰護之。亡何。而主僧仲頤告寂。慶子思以五年夏五月來蒞寺事。謂欲復吾故宇。莫先於治殿。以揭虔妥靈。耆舊僧之意適同。各探己囊出錢有差。知事僧亦力相之。俄有大商至自江右。獻巨楸六十有三。尋收亡僧所遺錢以緡計者五千。銀以兩計者七百八十。田以畝計者四百。旣而達官大姓。相繼輸錢而施。不啻十萬緡。於是隨木之植。以鳩其材。斂田之入。以給其食。量緡錢之多寡。以總其費。殿之始建。以其年冬十有二月。凡其制爲間二十有四。其崇八尋。倍其崇而益。尋有二尺。以爲修。半其修而去。尋有二尺。以爲廣。功未竟。而子思以至正二年春。遷四明之延慶。本無由延慶東堂出領茲山。悉力殫慮。圖終其役。三年春三月。殿成。冬十月。本無逝。四年閏二月。慧日自下天竺陞補其處。節縮浮費。并哀衆施之羨餘。完以汚漫。飾以髹彤。而前堂後室。煥乎一新。先是平章政事執禮和台光祿公。視其帳座故敝。男子思錢五千緡。使改爲之。鸞翔鳳翥。金碧焜煌。諏辰協吉。安奉如式。逮慧日之來。而器物之頽。法所宜有者。纖悉畢備。緡白之侶。有所瞻依。薦紳之流。咸欣慶焉。杭

在異時爲行都。旄頭屬車之幸臨。宸章奎畫之褒飾。寶冠龍符玉銜。觚彝之賜予。昭其餘輝。下賁林壑。矧今昭代。帝德所覆。承讓有嚴。名香花幡。中使狎至。王公貴人。至於閭里好事之家。稽首慕趨。恆恐不及。宜不難於以壞爲成。然猶六更歲籥。三換主席。乃克就緒。是用備記其廢興之顛末。來者尙鑒於斯。俾勿墜周密武林舊事上天竺靈感觀音院天福中建名天竺看經院咸平初賜今名淳祐中賜廣大靈感觀音教寺舊寺類蔡妻書後理宗易以御書外山門乃蔡京書紹興乾道淳熙皆嘗臨幸有十六觀堂應廣閣題諸有海理宗御書有雲漢之閣藏累朝所賜御書兩峯堂白雲堂中印堂清華軒延桂閣秋芳閣半雲閣前後賜珠冠玉爐珍玩甚多每水旱朝廷必禱焉

南天竺崇恩寺記

杭之南山。由雷峯訖龍井。其間浮屠之居。四十有二。而傳天台之學者。惟崇恩演福寺爲最盛。寺在小麥嶺積慶山之靈石塢。今所謂南天竺也。宋渡江初。未有寺。嘗斥爲牧地。後以爲祥光異響。出現其間。人咸驚異焉。淳祐戊申。葬貴妃賈氏於山之左。肇建寶坊。錫以今額。命天台宗師圓菴果爲開山。率其衆人而居之。尋復給田。以充華香食飲之須。降錢以資土木營繕之費。景定壬戌。葬周漢國公主於山之右。益畀以吳江上腴之田五十畝。嗣領教事者初嚴鑑石。庭生並賜紫衣。加右鑿議。咸淳戊辰。賈魏公柄國。以妃同氣。故大發私帑。俾禪僧絕岸湘。增新其棟宇。顯敞宏麗。視昔有加。至元丁丑燬。久未克興復。會法席偶虛。行宣政院求能負荷其事者。得今才公以住。是山。至正癸未也。洩事伊始。僧俗信嚮而至者。或爲創大殿造洪鐘。或爲作三世佛及文殊普賢迦葉阿難之像列。或爲作觀自在像湧現其後。或爲作梵釋二天像列侍其旁。或施以大藏教。而十地菩薩大阿羅漢護法天神之像。則合衆力以成之。寺之耆舊。咸克交

贊叶助。而分督其役。齋室蒙堂庫庖。涵既莫不畢具。而雲堂丈室。經鐘二樓。皆次第告成。檀越有祠在殿西偏。門徑迫隘。則闢使寬廣。凡可以致其力者。無不爲也。惟是茲山支於天目。至是適當風氣之會。清淑所鍾。鬱而不洩。岡巒迴復。窈然靚深。泉甘土肥。林木茂遂。誠宇宙間奧壤也。才公名必才。字大用。嗣法於湛堂云。

修祥符寺記

衢之祥符。舊傳吳將軍鄭公。評年九十有三。捨所居爲寺。其逮元已不啻千載。中間歷幾廢興。皆無所攷。由至元丙子兵燹之餘。龍象散亡。人天推慕者。又五十年於此矣。泰定乙丑。義山來主茲寺。慨焉以興復爲已任。因前人所作三門大殿。加蓋瓦級。輒而髹彤藻績之。造佛菩薩神像十有一軀。剏東西廡寶塔珍臺。煥焉畢新。室堂庖涵。繕治以次。以七載之勤。成就如是。而不敢遽以爲足。謀所以崇役之未已也。其徒咸共慶幸。俾來屬潛書其所欲道者如此。

龍山淨明寺記

寺建於晉天福七年。吳越文穆王給號廣濟。以處佛子之爲律學者。大中祥符元年。乃賜今額。南渡草創。有司以其地在國之陽。因取僧所食田若干。贖爲祀天園丘。而寓齋宮於者室。久之。僧相率自言起處非便。請撤寺屋。卽其西南改築而居焉。至元二十年。所司以聞於朝。願斥祠壇仍爲田以畀之。事阻不行。延祐二年。位山律師國瑞以訴於行省。始悉得其故地方。謀所以增庠益狹。而或者不戒於火。師慨然以興

作爲己任。旬積月累。閱十寒暑。而寺以復完。凡殿堂門廡庫庖。涵總爲屋若干區。費錢若干緡。一出於經用之羨財。與其私橐。毫末之助。不以資於人。秦定四年某月某甲子。落成之日也。師之同業與教律師道明。以書來曰。淨明廢興之顛末。竊見於郡乘。而瑞之經營寺事。未之有述也。幸爲文以記之。寺故有江月菴。笄鳥亭。而所謂梅巖。易安齋者。又爲齋宮時所創也。累朝御題石刻。猶在云。武林舊事。方家峪淨明梅巖。高孝兩朝御和詩。滿山皆櫻欄。舊有江月菴。笄鳥亭。

武昌大洪山崇寧萬壽寺記碑

鄂之城東有佛刹。曰大洪山崇寧萬壽禪寺。此黃鵠山也。而謂之大洪山者。蓋大洪隨之名山。自隨而鄂。自鄂而許。地雖易而名號不殊。示有所本云爾。鄂今爲武昌。山距城十里而近。北枕江漢。南帶湖湘。東居壽昌。下瞰樊水。層巒疊巘。交拱互揖。西接城堞。民塔萬區。前臨通達。而市聲邈不相及。山之顛有岳忠武王手植巨松。斗牛亭。仙人石。鼓崖。尤爲奇偉。地位峻絕。風物清閒。寺特據其尤勝處。遡其所自出。推靈濟慈忍大師爲初祖。大師諱善信。以唐武德二年四月六日。下生於洪州南昌王氏。受度於本州開化寺。爲衆僧執爨三年。僧力卻之。大師涕淚雪泣。戚嗟不已。有老父告之曰。汝緣在南方。衆不容。盍行矣乎。逢隨卽止。遇洪卽住。大師遂挈瓶錫南還。以寶歷二年秋抵隨州。觀一山巋然。問於逆旅主人曰。此爲何山。答曰。大洪山。大師惕然思老父語。則延緣而入。至於山麓。諸水所萃。匯爲重湖。神龍居焉。旱乾水溢。有禱輒應。時久不雨。鄉人張武陵。具鷄豕將以致禱。大師見而悲之。謂武陵曰。雨暘不時。本由心感。害生自利。徒

增汝罪。可戒勿殺。而爲汝祚。約以三日必雨。武陵聽之。大師探幽履險。得山之北巖。泊然宴坐。運誠默禱。及期。雷雨大作。雨旣霑足而止。武陵訪求大師於巖中。大師時猶在定。蛛絲罽面。附耳而號。挂體而控。久之方覺。武陵遂施以其山。爲建精舍。太和九年二月二十五日。大師密語於龍神曰。吾前許以身代牲。輟汝血食。本捨身。可享吾肉。卽引刀斷左右足。白液滂流。儼然入滅。雙足留鎮山門。肉色久而不變。四衆哀慕。稱之曰佛足。有司以聞於朝。賜號慈忍大師。所居精舍。賜名幽濟禪院。後以禱祈屢有奇驗。累加大師號。曰靈濟慈忍。其佐神千有二。封爵自王而公而侯。等差不同。皆天下知名之神。威靈烜赫。被於四方。此隨之洪山也。宋末。隨數被兵。洪山又當其要害。爲南北必爭之地。邊境之民。旣多流散。叢林之下。亦無以安。荆湖置制使孟公珙。隨人也。與都統張公順。謀遷僧衆。適於樂郊。乃度地於茲山。請雲庵與自隨。捧佛足。及累朝所賜告敕。徙寺額。僑置焉。仍奏請賜今名。曰崇寧萬壽寺。口興爲之開山。此則鄂之洪山也。興之口無諍須。則口寔繼之。我世祖皇帝在潛邸時。南伐。駐蹕鄂之元興寺。遙見茲山之頂。有神人立於雲端。詢知爲大師化迹所寓。深爲敬異。暨班師。寔因留佛足。扈從至京師。特命安置於祕宇。而嚴奉之。上旣正位宸極。有旨遣使偕寔。護送還山。道出許州。佛足重莫能舉。使者歸奏。詔卽其地建寺。此又許之洪山也。鄂經摧陷之餘。寔又去不返。呂文德制置荆湖。請無積口主之。而寺以復新。繼之者緣菴遇。建靈濟塔。增置菴院土田。而口崖潤。無邊詠。竹谿禱。又繼之。寺以災毀。禱方謀起其廢。俄委順而化。至順三年。今住持華公實來。毅然以興復自任。積衣孟之貲。躬求良材。於江上造大棧以歸。願舊址局於地勢。隘陋褊迫。

位置不皆合於規式。乃夷崇岡。壘巨壑。累石爲基。使就顯敞。首創大佛寶殿。棟宇之制。悉擬於京師。列刹而華飾有加焉。兩廡山門之上。爲萬佛閣。演法栖僧有堂。輪藏及祖師王公有殿。天書有閣。而鐘樓經臺。丈室茶堂。旃檀林前。資寮庫庖。漏之屬。無不畢備。始作於元統二年之某月。訖工於至正某年之某月。費錢總若干萬緡。出於華公者一萬。出於耆舊僧宗森者二萬。餘皆出於衆施及經用之羨財。金碧髣髴。輝映林谷。宏模偉觀。人天具瞻。其在先朝。嘗以爲中宮祝釐之所。願以香燈金幣。褒禮甚厚。三大洪山。法席之盛。莫武昌若也。華不遠數千里來徵文以記之。潛竊以毘盧身上。周徧一切三千世界。一一須彌。無去無來。非彼非此。然則山未有寺。法界宛然。寺之旣遷。依然故處。增減成壞之相。了不可得。豈世俗文筆所能記乎。若夫法身大士。示口有爲。於始幻境。作饒益事。應化之迹。亦有可得而言者。庸次第本末。俾歸而刻諸華別號枯木。嗣法於靈隱悅堂闇禪師云。

虎邱雲巖禪寺興造記

自佛學行於中土。法幢所建。必天下之名山。莫不侈爲寶構華居。以宅夫形勝。蓋以表靈山之未散。作大衆之依怙。俾來者覩相而生信也。丹青土木之事。雖若涉於有爲。而事之與理。不相留礙。推理而適於事。清淨覺地。卽大伽藍。混事而歸於理。積土聚沙。皆以成佛。一切世間成住壞空之相。固未有出乎心境之外者。苟非乘方便力。遊戲如幻。安能具大莊嚴。爲無上之勝因也哉。吳郡西北有山曰虎邱。或謂之海湧峯。有大招提。曰雲巖寺。山之得名。寺之剏立。悉見於圖誌。山則吳王遺蛻之所託。秦王轍跡之所屆。劍池

及試劍石存焉。寺則晉王氏昆弟司徒珣司空珉所施之別業。生公講臺處點頭石千人坐在焉。宋至道中始以寺爲禪刹。皇祐初又更爲十方住持。紹興間長老比丘隆公以圓悟嫡子坐鎮茲山。法席鼎盛。東南大叢林號爲五山十刹者。虎邱遂居其一。大慧以法門兄弟相依最久。翻經有臺。容聲儼然。繼以雪庭。瞎堂。松源。笑翁。諸宿德倡道其中。而宗風愈振。纂承基緒。代不乏人。而支傾植仆。日不暇給。際今昌辰。尊崇像教。猶或失於因循。未克大起其廢。重紀至元之四年。行宣政院以慧燈圓照禪師普明嗣領寺事。至則裝飾佛菩薩阿羅漢金剛神。壞造文殊普賢觀世音三大士。繕治舍利之塔。經律論之藏。範美銅爲鉅鐘。視棟宇之摧墮蠹敝者。或因或革。百役並舉。大佛殿。千佛閣。三大士殿。藏院。僧堂。庫司。三門。兩廡。古木。寒泉。劍池。華雨。諸亭。則仍其舊。祖塔。衆寮。倉庾。庖湢。宴休之平遠堂。遊眺之小吳軒。山之前爲重門。則改建使一新。環寺爲渠六千餘尺。陘於客土。水退弗行。則疏瀹之。凡其費一出於經用之羨財。而集衆施以助其不給。方謀石築堤。屬於城闔。以復唐刺史白公故迹。未及庀工。禪師遷主本郡之承天能仁禪寺。爰序其成績。來取文以記。禪師材周而智圓。達事理之不二。觀一切法皆佛法。未嘗於一法中。妄計無爲有爲。而生欣厭。故其經度指授。久而弗懈。閱七年如一日。宜有以潰於成而不愆於法也。前作後述。是在來者。可無以告之。使勿墜其已成之業。而益廣其所爲之志乎。記爲興造而作。山川靈異風物之美。著於前賢紀詠者。此不復出。禪師族松江曹氏。說法嗣晦機和尚。於大慧爲五世孫。於隆公爲五世從孫。云。至正六年冬十月甲子。中順大夫祕書少監致仕黃潛撰。

聖壽禪寺記

聖壽禪寺在義烏縣西三十里。故號龍壽。宋治平中乃畀今額。大觀間更爲十方禪寺。歲久弗葺。椽棟毀墜。藩拔級夷。敗屋數楹。不蔽風日。荒基斷礎。四顧寥寂。盛衰固若有時。而山川之勝。初無古今之異。特以地勢僻絕。非尊官富人輟跡之所及。而其徒蓄縮不自振。日益散落。雖遭逢聖教興行之世。莫有以爲意者。泰定二年秋。千巖禪師來自錢塘。愛其岡巒秀潤。泉清水深。始度隙地。結茅而駐錫焉。緇素之侶。嚮風至。集座下者。恆數千百人。至無以容其居。給其食。僧法聰德超。慨然出山。叩諸有力而好事者。於是齊郡太夫人張氏。首捐金爲買田若干畝。有奇。里中一大家樂聞之。爭給材甍以復其故宇。佛殿則樓君如淩。山門則樓君一德。法堂則翁君宏道。觀音殿則張君道興。皆獨任其費。妙相中嚴。威神外護。妥奉有儀。瓜華旛蓋器物之須。設置如式。且各助以田二十五畝。有奇。旣而一德之子天與。天澤爲作僧堂。同郡善女徐爲構鐘樓。吳氏王氏爲蓋齋庖。僧清雅尋集施者。範銅以爲鐘。由丈室至左右兩廡庫庖之屬。則合衆緣以成之。效奔走經營之勞。以創塔院者。尼壽寺。造漏室圍樓者。僧德義也。禪師之來。凡十有八年。而其法之所宜有者。靡不畢備。規制之廣。則視舊有加。禪師爲而不有。擇叢林中德行完潔者。俾之住持。承其付託者。亦能負荷而無所係吝。不久輒謝事而退。自懷空成公。無用貴公。東白昇公。絕照昶公。龍門省公。無礙了公。逮今滅宗繼公。已七傳矣。繼謂予曰。在吾教中。聚沙積土。無非佛事。法施財施。寧有差別。請爲我並誌之於石。庶幾來者不昧所事。而思有以報稱焉。予聞禪師以單提直指。普對羣機。不起於座。而

道價之重。傾動遠邇。宜其以壞爲成。無難也。有能於禪師之道。一念淨信。舍諸所有。而不自以爲德。豈易然哉。庸因繼之請。摭其所述。而悉著之。使刻焉。禪師名元長。俗姓董氏。說法嗣幻住本和尚云。至正五年秋八月庚申撰。

淨居教寺碑記

黃檗山在吾烏傷北。望之森然。其起如鷲。其伏如踞。其支而出也。如趨如附。亘二十里。靡迤而不絕。抵縣治乃已。由山之趾。緣修蹊而上。磬折行清池古木間。至其腹。重岡沓嶺。周如四墉。則又窈然而深。有佛廬曰淨居。唐涉公禪師行道之所也。先是山皆榛莽。豺狸蛇虺。以爲窟宅。樵蘇之迹。所不通。涉公以雙林緇錫。猥衆。欲去喧而就寂。咸通中。始來隱於此。結茅自蔭。宴坐盤石上。人無知者。久乃得棄蔬澗水濱。遂相率訪求之。旣見。而高其行。爲闢地治棟宇。如其它浮屠居。且白狀於刺史。以聞。賜寶勝額。宋大中祥符初。易今名。景定末。大比邱珏公。以癡公嫡嗣。領天下第一山。理宗甚尊禮之。故其境以人而益勝。予兒時避兵山旁民家。屢往憩焉。仰視殿堂。丹采皆黝昧。父老指石羅漢云。相傳池水嘗夜出光怪。因得此像十六。及石磨一。或以爲廬山歸宗寺故物。莫知何以至此。又指前鉅閣云。此御書閣。舊藏理宗所書荆叟兩大字。荆叟珏公自號也。後予游宦四方。不能數造其處。屬者偶過之。則文拱華棧。晃耀林谷中。前嚴金相。後列玉函。花香物品。備完無闕。上人法暉揖予而言曰。暉少得業。是山。今老矣。大懼無以續前人之緒。遺營積累。殆十星霜。佛殿則創於泰定元年之十月。藏殿則落於至順三年之二月。僧堂兩廡。次第畢新。蓋其

材則因山之良。食則取歲之羨。不足則繼之以衣孟之私。雖未嘗持筭走民間。里中好事者捐錢爲助。亦弗拒也。竊不自揆。將馳書謁辭。以紀歲月。而辱惠顧焉。敢遂以爲請。嗟夫。今之爲佛學者。方務飾空言以相高。凡塔廟之奉。數於非道之所存。而不以屑其意。上人乃能達禮事之不二。汲汲焉扶植振起之。豈非難哉。予觀茲山。土堅石秀。水無暴湍。杉櫨松楠竹箭之產。茂美而悅澤。清淑所鍾。固宜代不乏人。高山仰止。涉公之行業。珥公之名德。未墜也。綢繆牖戶。上人之功。曷可以弗嗣乎。書而歸之。俾刻諸石。庶來者有槩於心。而益致其力焉爾。其徒相是役。及施者之名氏。具列於石背云。

景德寺碑記

名勝志景德禪寺在秀水縣西南四里。舊焚化院宋名景德寺亦名三塔寺。

嘉興郡治距西四里。爲景德寺。按寺籍記載。其初蓋白龍潭。深險莫測。往往風雨壞帆檣。晴則有白光三道起水上。唐季異僧雲行者。日運土石以實潭。遂建三塔以鎮之。水至是迴抱灣環爲大道場。乃構棟宇祠佛菩薩。而以龍護法焉。當五季吳越錢氏有國時。賜名保安禪院。宋景德中。勅天下郡縣爲景德寺。故易今額。嘉定九年旱。邑人禱於龍得雨。爵龍爲靈澤。而祠曰順濟。符牒具在。逮元至元中。古禪性公奉靈書褒護。後至元年。雲海寬公來主是席。旣浹事。睹殿宇敝壞。將圖更作。遂議於衆。給以寺租。助以衆施。乃大構焉。經始於至正五年之十月。落成於明年之九月。衆謂是役不易。非有記述。後嗣奚稽。遂書諸石以垂不朽。

重修普明寺記

從山南麓。普明教寺在焉。僧法炬爲予言。山之未有寺也。里人陳氏居之。有以身爲僧。而以家爲寺者。是爲文通法師。山之初祖也。寺建於唐天祐。號報恩。逮宋祥符。乃錫今額。而俾以甲乙次相授。黃牒故在。可考。歲寢遠而繕治勿繼。華棧文甃。或委爲土梗。吾徒懼焉。相與殫晝夜之勤。日緜而月緝。迄今餘二十稔。未始資毫末之助於人。而仆者起。缺者完。像座華幡。鐘食飲之物。纖悉必具。凡爲三門。而斲石爲楹。以棲扁榜於其外者。炬之父舜若深及安也。爲室以禮六時者。安及炬若觀也。爲輪藏實經其中而屋其上者。炬父子也。惟吾浮圖氏。廟塔在人間。廢興相尋。如漚起電滅。茲山之香爇燈炷。閱幾成壞。而不與劫俱化。蓋吾祖之蒙被其後嗣者。深且厚也。願有述。予始至其處。見其池深而木寒。甃桷戶牖。隱顯烟際。意以爲此仙聖之宅。必有化佛靈僧寓跡其間。而炬言如此。飛鴻印雪。爪趾宛然。固無俟予擬諸形容也。姑敘興復之槩。使刻焉。

書袁通甫詩後

先生落拓不羈。放情物表。肆筆成章。皆直寫其胸中之奇。春江靜波。秋山峻峯。不足爲喻也。吾儕碌碌。從俗浮沈。與先生相去遠甚。而欲強加評品。正如盲人說象。知其鼻者謂象如杵。知其牙者謂象如蘆葦根。一語不契。便成聚訟。豈不發先生泉下一晒也哉。時元統二年七月。

跋鄭仲舒字辭

古者冠而字。三加皆有祝字之辭。一而已。無所謂說也。蓋伯仲叔季長孺次公之類。非可以文義推求也。

後世有以人之字不足配其名而爲之說以易之者。老泉之於兄渙。東萊之於戴衍是也。今人一字或至十數說。乃古所未有。浦陽鄭君名濤。字秉常。而鄉先生柳公改字之曰仲舒。且以辭發其義。則老泉東萊之遺法也。仲舒尙佩服之哉。至正十二年春正月甲子。

題紫霞集

西巖紫霞洞。俞氏世居其左。予曩歲佐治寧海。過其里。因得歷覽其勝。然而石室蒼藤。茂林修竹。森秀岑鬱。蒙密蔽虧。蕭蕭然有離塵遠俗之意。信乎東陽佳山水。而西巖又佳山水之尤者。後二紀忽閱此圖。知其茂林修竹仍無恙。起予遐思。俾書以紀。

瑞雲觀記

瑞雲觀在吳江城東三十里。所謂笠澤福地也。煙波莽蒼。四望如一。士民安於耕桑。樸淳有古風。水木清華。禽魚上下。夔若世外。固僊聖之奧區。然而更千百年。棄委於田夫野老之手。未有能啓其祕而專其勝者。至元二十九年。靜安陸高士始作菴其處。於是昔之祕者無所伏。勝者益以發舒。大德九年。復斥故宇。易菴以觀。合其徒而居焉。觀之制中爲三清殿。旁爲北斗玄天太一三元別殿。祠堂寢室講舍齋宮門廡。庖湍。次第畢備。而爲役最鉅。泰定二年。乃告迄工。爲屋以間計者百有餘。繚以修垣。除道成梁。屬於南隸。既又割上腴之田千五百畝。以資食飲百物之須。其法之所宜有者無不給。爲費一出於高士。而高士之悉力殫慮。二十年於此矣。初菴之爲觀也。教主嗣天師爲署。今額至是所司具以觀成刻上天子。特下璽

書加護焉。高士旣勵其徒，俾勿替。且飭其族之人，毋敢有所侵。懼後莫之考，而或毀其成也。爰伐石來徵文爲記。夫乾坤清淑之氣，川融山結，非有數量，而僊經所錄洞天福地，僅一百二十八神而明之，不以其人歟。幸以境與人遇，而又蒙被君師之力如此，游而息焉者，衍衍施施，未有已也。高士名志寧，字景雲，吳郡人。

化城院記

仙華山化城院者，僧若空之所窺也。山之東，隱君子方先生居之。先生歿葬山之南，院距墓一里而近。邑士與先生有雅故者，以空嘗從先生遊，相率卽院中祠先生，且以門人柳貫所爲銘刻置祠下，而院之構與，顧未有所登載。潛忝及先生之門，先生之子樗來爲空謁記，誼不得辭。按圖志，仙華山在浦陽縣北，高一百五十丈，周二十五里，列岫如屏，障爲風穴。古仙人飛昇處，有宇在其下云。先生游錄稱，自巖腹望峯頂，丹光閃閃如寶蓮花，稍進至仙壇前，聳峭離立，東一峯拆立數百丈，俯視如池，又東一峯如削，循其罅而上，踰石嶠如戶限，北下如井，折而東，至第五峯之背，有石屋可坐數十人，又東爲中峯，下睨烏傷，東白原，隔聚落如碁布，其北諸山與新定接，又一峯在其東，峯極峻絕，不可攀緣，而第二峯懸崖，有穴深黑，風薄兩崖上，生草木皆動。凡先生仗履所歷，較圖志所叙，尤險怪崛奇，誠天壤勝槩也。空受業於山，北皇安山之普利院，而徧浙東西州，求善知識，咨決心要，旣而充然自得，浩乎其歸，叢林虛席，屢以名利讓，皆避不就，恆惴惴焉，恐退藏之不密，對仙華之秀，冀將卓錫其中，乃遊北麓，披葦荒而入，得其地於鄰黃氏，直

東峯之下，窈然深靜，遂翦荆棘，結茅以自庇，劣僅容膝，名之曰雲巢，無登涉之勞，而有宴息之安，以爲若是不啻足矣。里人朱仙亦先生門人，與空方外交，嘆其自處太偏陋，首捐田爲闢基址，而同里樓億爲作佛廬齋寢庖湑，龍峯主僧永鎮，撥田三畝，有奇裨之，而空之師清衍，暨好事之家，又助以田山園總百畝，更其故所居雲巢曰化城精舍，空自建鐘樓門廡，益置二十有八畝，爲久遠計，易精舍之額曰化城院，而國師爲降法旨加護焉。重紀至元元年之夏四月也。至正改元之二年秋九月，空復與其徒道元本覺，撤舊屋一新之，自大殿至齋堂寢室兩廡三門，悉同巨剎之制，佛僧之奉，具備如式。茲山之面目，亦軒豁呈露，先生向所覩怪奇壯偉之觀，可不煩舉趾而坐致也。蓋空之倦遊而返故山，志在遺去囂絆，探幽擇勝，以佚其躬而已，未始卽人，而人自卽之，用能建置成立如此，以無媿於古之有道者，而空又能以其餘力，與先生周旋於文字，其名固當配先生以傳，如廬陵之有勤，眉山之有潛，相爲不朽，豈徒區區丹青土木之美，相誇詡也哉。姑記其作始大略，俾無忘所自云爾。空字無相，族吳，先生之祠事自有述，茲不書。至正四年冬十一月甲午，記。按此記係浦江張燧輯自續稿。

譜系引

家譜之作，所以溯祖系之遠，而紀族人之繁也。而族人之繁，不無播遷散逸，輒亦闕而不載，或載而不詳。至於祖系之遠，則誰邈不可追者，容或委曲附會，以爲某名賢某鄉先生之後，噫，此豈特汾陽之拜，貽人嘲笑，自問厥心，應亦有艱然不安者矣。人各有族，族各有祖，祖有所自出，而祖之所自出者，又更有其

所自出。泝而上之。皆吾祖也。果其脈絡相傳。鑿鑿可據。則當詳稽備登。以示不忘。否則寧略毋詳。寧缺毋備。蓋缺之則譜有未登之祖。而吾祖之真者自在。不缺而游移彷彿之間。或且冒他人之祖以爲己祖。而其真爲吾祖者。反以家譜之作而外見。是豈爲子孫者所忍出哉。我黃氏自縈祖之後。散爲江南五大族。遞傳至洞門始祖昉府君。與文節公庭堅爲一派叔姪。按諸舊圖。自文節而上。班班可考也。譜概不追敘。而直以昉府君爲一世者。蓋謂前此雖有可追。而邱隴莫尋。祭祀久缺。沿襲舊聞。保無遺漏。不如缺之。而其真自存。初非有愆置其祖之嫌也。亦謂如此而上自祖宗。下暨子孫。其心均無弗安云爾。

陳澤雲周易爻變易蘊序

易更四聖而成書。秦火之餘。幸因卜筮而僅存。自漢分爲三家。有田何焦貢費直之易。易之說瓜裂矣。至魏王輔嗣。雜以老莊之學。易之說愈遠矣。繼是諸儒注釋。奚啻數百家。或泥於天道而不及人事。或專乎義而不及象數。角立異論。茫無統緒。天台陳澤雲。獻肅公邦彥先生之後。易有家傳。延祐間。余丞寧海。澤雲由黃巖文學。起爲郡曹掾。議論雄偉。剖決如流。凜凜然有骨鯁風。嘗曰。余家貧親老。不能遠遊。竊升斗之祿以養親。資尺寸之楮以著述。他無所覬也。挑燈夜話。出示野趣之什。清新俊逸。翰林承旨子昂趙公嘗序之矣。又數年。余爲越上監運。澤雲調明幕。把酒論文。出示詠史之什。美善刺惡。一出至公。翰林學士伯長袁公爲之序矣。澤雲曰。余欲著爻變易蘊。此潔靜精微之學也。時居簿書叢中。無食息暇。非二三年靜坐工夫。不能也。三年春。余乞老金華。澤雲以書來曰。余近調桐江賓幕。時宰急於聚斂。議論落落不合。

困守幕下。幸有餘暇。時復登釣臺。坐羊裘軒。臥山高水長閣。汲泉煮茗。洗胸中之不平。若有神助。今幸爻變易蘊粗成。使二三十年勤苦之志。一旦有成。未知果合於爻變之義。易之蘊否乎。子其爲我訂正之。余曰。易豈易注哉。復之彖辭曰。復其見天地之心乎。天地之心。唯義文周孔數聖人能見之。澤雲生於數千年之後。直欲見數聖人之心。不其難乎。雖然。道無終窮。才有超邁。余嘗焚香靜坐。觀澤雲所注之易。乾坤二卦。已無餘蘊。至於變爻三百八十有四。旁通他卦之義。爻爻有發揮。事事有攷證。造理精微。立說洞徹。餘如刪正太極八卦爻法逆順等圖。探賸索隱。自非灼然有見乎聖人之心者。不能也。讀之使人聳然。覺不覺。倘使程朱諸子復生。未必不擊節而加嘆也。余投老田里。安得以澤雲所注之易。真諸翰苑。與同志者商之。使澤雲名垂不朽。是則不負其二三十年勤苦之志也。澤雲勗之哉。至正丙戌正月。按澤雲名應潤。著周易及變易蘊四卷。

義烏志序

義烏自秦爲縣。歷漢唐訖五季。見於前史。與它圖記者。或總序一州一郡。或略舉一事一物。其詳靡得而周知。宋元豐舊志。出於縣令校書郎鄭安平。而所記下及南渡以後。必非其本書。咸淳續志。出於潛之族曾祖漕貢進士應劭。手藁見在。而別本互有異同。蓋方纂輯而未經裁定。亦非其成書。矧自國朝統一。函夏縣地入於職方。已七十有八年。官府之建置。人物之登用。風俗之趨嚮。戶口之盈縮。貢賦之多寡。悉無所登載。可不謂闕典歟。爲政者迫於簿書期會。米鹽碎務。未遑有所咨訪也。今縣大夫操約馭詳。而事無

不理。爰以暇日。詢山川形勢。地之所生。語言土俗。博古久遠之事。得元豐咸淳二書。屬潛重加詮次。以傳潛衰朽荒疎。無能爲役。乃俾王生禕。朱生濂。合二書而參之。郡乘刪其繁冗。訂其舛誤。法當補書。則引類相從而增入之。附之辨證。釐爲七卷。初以圖冠於篇首。潛旣辱視其成。自爲之序。會兩生並赴秋闈。遂使傅生藻相與校正。歸於執事者而刻焉。見大夫達魯花赤儒林郎亦隣真。畏兀兒人。尹承直郎陶思泰。許州襄城人。至正十三年秋八月二十日。

黃文獻公集卷之十二

附錄

故翰林侍講學士中奉大夫知制誥同修國史同知經筵事金華黃先生行狀 宋 濂

先生諱潛字晉卿姓黃氏黃爲婺名族至宋太史公庭堅族望尤著太史之從父昉生景珪俱來浦江景珪生琳娶忠簡宗公澤之女弟始遷於義烏琳生中輔力學尙氣節當秦檜柄國士有議己者輒捕殺猶奮然題樂府太平樓上有欲斬佞臣頭之語人至今誦之晚以轉運使薦當得官命垂下而卒中輔生紹祖紹祖生伯信於先生爲高祖迪功郎累贈朝散大夫妣宗氏忠簡公四世諸孫女累封安人曾祖夢炎淳祐十年進士仕至朝散大夫行太常丞兼樞密院編修官兼權左曹郎官以朝請大夫致仕妣陳氏累贈宜人繼方氏祖塲方出也以進納恩補承節郎入國朝弗仕今累贈嘉議大夫禮部尙書上輕車都尉追封江夏郡侯妣徐氏淳祐七年進士奉議郎兩淮宣撫大使司幹辦公事彬之女今追封江夏郡夫人父鑄以朝請府君遺澤補將仕郎今累贈中奉大夫江浙等處行中書省參知政事護軍追封江夏郡公妣童氏承信郎監嘉興府鮑郎鹽場伯永女今追封江夏郡夫人夫人姪先生時夢大星煜煜然墜於懷歷二十四月以至元十四年冬十月一日始生甫晬卽自免乳徐夫人抱而育之比成童不妄踰戶闥授

之以詩書。不一月皆成誦。迨學爲文。下筆頃刻數百言。嘗著弔諸葛武侯辭。前大學內舍劉君應龜朝請府君之外孫也。見而歎曰。吾鄉以文辭鳴者。喻叔奇兄弟爾。是子稍加工。不其與之抗衡乎。因留受業。弱冠西游錢塘。前代遺老與鉅公宿學先生。咸得見之。於是益聞近世文獻之澤。暨還故居。從仙華山隱者方君鳳游。爲歌詩相倡和。絕無仕進意。其友葉君謹翁力挽之出。大德五年。舉教官。七年。舉憲吏。就試皆中。其選已而復退隱於家。延祐元年。貢舉之法行。縣大夫又強起先生充鄉闈。時古賦以太極命題。場中作者。往往不脫陳言。獨先生詞致淵永。綽然有古風。特寘前列。二年。上春官。復在選中。及奉大對。惓惓以用真儒行仁義爲言。辭甚剴切。讀卷者以其頗涉於激。綴之末第。奉上旨。賜同進士出身。主選吏以爲白身補官。散階當下二等。上命特與對品階。授將仕郎。台州路寧海縣丞。僅踰再期。會有詔改鹽法。江浙行中書承制。遷兩浙都轉運鹽鐵使司石堰西場監運。事聞。命仍舊階居其職。閱四載。以功超一資。陞從事郎。紹興路諸暨州判官。至順二年。用故御史中丞馬公祖常之薦。入爲應奉翰林文字。同知制誥。兼國史院編修。進階儒林郎。丁外憂去官。服闋。轉承直郎。國子博士。經六年之久。請補外。換奉政大夫。江浙等處儒學提舉。至正三年春。先生始六十有七。不俟引年。亟上納祿侍親之請。絕江徑歸。俄有旨命預修遼金宋三史。丁內憂不赴。除服。以中順大夫祕書少監致仕。居四歲。故湖廣行省平章公朶爾直班。今中書左丞相太平開府公。力交薦之。被上旨。落致仕。仍舊階。除翰林直學士。知制誥。同修國史。同知經筵事。進階中奉大夫。九年夏四月。游上章求歸田里。不俟報而行。上聞之。遣使者追及武林驛。敦迫還京。復供前

職十年夏四月始得謝南還行中書爲言於朝給以半俸終身公牘已具而未及上十七年秋七月今江浙左丞相金紫公達世貼睦邇方承制司黜陟之柄移書起先生咨議省事以病力辭閏九月五日薨於繡湖之私第享年八十有一學士大夫聞之俱流涕曰黃公亡矣一代文章盡矣門弟子劉涓王緯宋濂傅藻等咸來相治後事以是月十八日葬於縣東北三里崇德鄉東塋之原距嘉議府君之墓僅十步娶王氏嘉熙二年甲科進士從事郎昭慶軍節度掌書記困金之曾孫文林郎監沿江制置副使司造船塢沂之孫將仕郎桂之女今累封江夏郡夫人先一年卒及是始合葬焉子男一人梓用蔭入官初授忠顯校尉紹興路同知餘姚州事女一人適惠州學正陳克讓俱先卒孫男四人瑄琛璿珣所著書有日損齋初稟三卷續稟三十卷義鳥志七卷筆記一卷先生在寧海時縣地瀕於鹽場而亭戶恃其不統於有司肆毒害民民不敢正視編氓之隸漕司洎財賦府者亦謂各有所憑橫暴尤甚先生皆痛繩以法吏懼以利害白弗顧也有後母與僧通而酖殺其夫者反誣夫前子所殺獄將成先生變衣冠陰察之具知其姦僞卒直其冤遠近以爲神明巡兵捕鹽販者急遂沈鹽於河帥衆以拒巡兵怒乃取他私販事以實之民有在盜籍者謀爲劫奪未行邑大姓執之以圖中賞格初無獲財之左驗事皆久不決先生爲之疏剔以其獄上各論如本條免死者三十餘人部使者董君士恆行縣廉知先生有治狀事悉諉焉先生爲黜其以賄敗者軍百戶一人縣吏二人在官無祿者四十餘人愚民以婚田鬪競往訴咸下其狀多至數十百先生錄其當問者卽不當問者遣之先生明習律令世以法家自專者有弗如也凡經其論定翕然畏服

不敢重有辭。歲大旱，禱於靈湫，有白龍蜿蜒見湫中，已而黑雲四興，大雨如注。縣以有年在石堰，視諸場爲尤艱，居是官者，常以秤盤折閱，及不能檢防私鬻被譴。先生規措有法，無毫分入於吏議。在諸暨，其俗素號難治，先生不加鄙夷，一導以善政，民多從化。捕盜司屋壞，撤而改作，無敢後期。巡海官舸，例以三載一新，費出於官，而責足於民，有餘則總其事者私焉。先生莅適是役，撙節浮蠹，以餘錢還之，爭驩呼而去。奸民以僞鈔鉤結黨與，脅攘民財，官若吏聽其詐，挾之以往新昌、嵎縣、天台、寧海、東陽諸縣，株連所及百餘家，民受禍至慘。郡府俾先生鞠治，一問皆引伏。獄具，官吏除名，同謀者各杖之。有捕盜卒陰僞鈔板於良民家，乃白於官，往索之。惡少年持挺從者近百人，先生遇於野，詰從吏者曰：「弓卒額止三十，安得此曹耶？」可縛送於州。聞者遁走，有盜繫錢塘縣獄，游民賂獄吏私縱之，假署文牒，發兵來爲之鄉導，逮捕二十餘家，先生疑而訊焉，悉得其情，以正盜，宜得重議，持僞文書來者，又非州民，俱械還錢塘，誣者自明。奉省檄監稅杭州，先生御之以寬，商旅四集，僅閱三月，增錢十二萬緡，有奇。在成均，視弟子如朋友，未始以師道自居，輕納人拜，而人來就學者，滋益甚，業成而仕，皆有聞於世。時人欲增設禮殿，配位四，配位合東坐而西向，學官或議分置於左右，同列不敢爭，先生獨面折之，其人恚甚，日坐堂上，以危語相加，御史惡其無禮，遂去之。乃克如先生言，在禁林，會修本朝后妃功臣傳，先生爲條陳義例，多所建明，士類服其精允。進講經筵者三十有二，經筵無專官，曰：「頴曰：知咸宰執近臣，講文之述，率屬先生訂定，非有關於治道之大者，不敢上陳，其啓沃之功爲多。」上嘉其忠，數出金織紋段賜之。始先生嘗預考江浙江西上都鄉試。

江浙則三往而一正其文衡。至是被上旨考試禮部。尋又爲廷試讀卷官。前後所甄拔者。盡知名之士。先生天資介直。絕不事造請。逢覃官者。一減資者五。銓曹或失於收斂。亦不自言。在州縣間。唯以清白爲治。一錢不受於民。所至無圭田。月俸弗給。每鬻產以佐其費。及升朝。挺立無所附。足不妄登。鉅公勢家之門。君子稱其清風高節。如冰壺玉尺。纖塵不污。先生性篤孝於親。親歿。營塚於三釜山。有乳虎馴狎之異。山去所廬十里。月旦望必展省。大暑寒不易。先世遺文。歲久或有殘缺。極力搜訪。補綴成編。家居不談米鹽細務。與公府短長。邑長吏來謁。鄉鄰有急。覬得片言爲援。輒峻卻之。尤不輕於薦引。或譏其絕物。先生諭曰。公朝爵祿。將以待賢者。豈爲吾私親設哉。先生貴而能貧。雖位至法從。蕭然不異布衣時。又寡嗜慾。甫臨強仕之年。卽獨榻於外。給侍於左右者。二蒼頭而已。遇佳山水。則觴詠其間。終日忘去。其冲曠簡遠之情。使人挹之。鄙吝頓消。與人交。任真無鉤距。不事矯飾。以爲容悅。而誠意獨懇至。然剛中少容。觸物或弦急。霆震若未易涯涘。不旋踵間。煦如陽春。曾不少留礙焉。先生之學。博極天下之書。而歸於至精。有問經史疑難。古今因革。與夫制度名物之屬。旁引曲證。語蟬聯不能休。至於剖析異同。讞決是非。多先儒之所未發。見諸論著。一本乎六藝。而以羽翼聖道爲先務。然其爲體。布置謹嚴。援據精切。俯仰雍容。不大聲色。譬之澄湖不波。一碧萬頃。魚鼈蛟龍。潛伏而不動。淵然之色。自不可犯。中統至元以來。如先生者。二三人而已。故凡國家典冊詔令。及勳賢當得銘者。必命先生爲之。海內之士。與浮屠老子之流。以文爲請者。日集於庭。力麾之而弗去。一篇之出。家傳人誦。雖絕徼殊邦。亦皆知所寶愛。雅善真草書。人有得其片幅者。

必藏。奔以爲榮。世之評議者。謂先生爲人高介。類陳履常。文辭溫醇。類歐陽永叔。筆札峻逸。類薛嗣通。識與不識。僉無間言。嗚呼。先生生當六合混一之時。鍾河嶽英靈之氣。積之既厚。所用亦宏。仁皇肇開科舉之初。卽以儒學自奮。歷仕五朝。晚乃入侍。今天子。掌述帝制。勸講經帷。巖然獨任斯文之重。天下學士咸所師法。遂使有元之文章。炳耀鏗鏘。直與漢唐侔盛。先生之功。固不細矣。至於出處大節。尤人所難能者。年未七表。而謝事。暨羣公力薦起之。俄復控辭。上方眷待之深。再召還朝。未幾又辭。其難進易退之風。真足以廉頑而立懦。揆之古聖賢之道。蓋無媿也。若先生之所自立者。豈不綽綽可傳於後哉。先生之薨。在法當錫諡立傳。濂從先生游。垂二十年。知先生爲最深。因輯任官行事。爲書一通。上於太常國史。然巨細詳記。不敢效古書法。爲簡嚴者。欲其事之白。以俟芟撫也。謹狀。

大元故翰林侍講學士中奉大夫知制誥同修國史同知經筵事贈中奉大夫江西等處行中書省參知政事護軍追封江夏郡公諡文獻黃公神道碑

至正十七年閏月丙午。翰林侍講學士中奉大夫知制誥同修國史同知經筵事金華黃公年八十有一。薨於家。是月己未。其孤梓與門人劉涓。王緯。朱世濂。傅藻等。葬於所居義烏縣東北三里崇德鄉東塋之原。明年以門人翰林國史院編修官同郡宋濂之狀。至京師。屬臨川危素銘其神道之碑。素宦學京師。辱公爲知己。公入直翰林。素爲供奉。同日命下。及遷宣文閣授經郎。從公於經筵。有詔修后妃功臣傳。素復爲供奉。從公於史館。居則同巷。嘗舉酒相屬曰。我死。子其銘吾墓。嗚呼。孰知卒承公千載之託哉。公諱潛。

字晉卿。姓黃氏。世居婺。至集賢。校理文節公。著於分寧。集賢之從父昉。生景珪。家浦江。景珪生琳。娶宗忠簡公之女弟。始徙義烏。琳生中輔。力學尙氣節。秦丞相檜枋國。殺議己者。獨奮然題樂府太平樓上。有礪劍欲斬佞臣頭之語。人至今誦之。晚以轉運使薦。當官命垂下而卒。中輔生紹祖。紹祖生伯信。迪功郎。累贈朝散郎。于公爲高祖。曾祖夢炎。淳祐十年進士。仕至朝散大夫。行太常丞。兼樞密院編修官。兼權左曹郎官。以朝請大夫致仕。祖塢。以進納恩補承節郎。以公貴。贈嘉議大夫。禮部尙書。上輕車都尉。追封江夏郡侯。父鑄。以朝請府君遺澤。補將仕郎。累贈中奉大夫。江浙等處行中書省參知政事。護軍。追封江夏郡公。初朝請之外甥女王氏。歸浙西提舉常平茶鹽司幹辦公事丁公應復。實生參政府君。及禮部府君。以疾廢。故朝請以爲其後。妣童氏。公之在好二十四月始生。母夢大星煜煜然墜於懷。生甫晬。卽自免乳。祖妣徐氏撫之。比成童。不妄出門。能背誦詩書。迨學爲文。下筆頃刻數百言。著弔諸葛忠武侯辭。前太學內舍劉君應龜。太常公之外孫也。見而嘆曰。吾鄉以文鳴者。喻叔奇兄弟耳。稍加工。其不與之抗衡乎。因留受業。弱冠遊虎林。故都之文獻具在。咸得徵焉。大理卿牟公巖。期公甚遠。歸從僊華山隱者方君鳳遊。爲歌詩相倡和。絕無仕進意。其友葉君謹翁力挽之出。大德五年春。舉校官。七年舉憲吏。皆中其選。已而復退隱於家。延祐元年。貢舉法行。縣長吏強起就試。作太極賦。傳於世。明年殿試對策。以用真儒行仁義爲言。賜同進士出身。授將仕郎。台州路寧海縣丞。縣地瀕於鹽場。而亭戶恃其不統於有司。厲民爲甚。編氓之隸。漕司泊財賦府者。尤爲橫暴。公皆痛繩以法。吏因以利害白。弗顧也。有後母與僧通而酖殺其夫者。

反誣夫前妻子所爲。獄將成。公變衣冠陰察之。具知其姦僞。卒直其冤。遠近以爲神明。巡兵捕盜販者急。遂沈鹽於河。帥衆以拒。巡兵怒。爲取他私販事以實之。民有在盜籍者。謀爲劫殺未行。邑大姓執之以圖中賞格。初無獲財之左驗。事皆久不決。公爲之疏剔。以其獄上。各論如本條。免死者三十餘人。部使者董公士恆行縣。廉知治狀。事悉委焉。公爲黜其以賄敗者。軍百戶一人。縣吏二人在官無祿者四十餘人。愚民懃婚田鬪訟。下其狀多至數十百。公錄其當問者。壹經論定。翕然畏服。不敢重有詞。世以法家自名者。有弗如也。歲大旱。禱於龍湫。大雨。境內有年。踰再期。會有詔改鹽法。江浙行省承制。遷石堰西場鹽運。命仍舊階。石堰視諸場爲尤難。居是官者。常以稱盤折閱。及不能檢防私鬻被譴。公規措有法。無毫分入於吏議。閱四載。以功超一資。升從仕郎。紹興路諸暨州判官。新作捕盜司巡海官船。例以三載一新。費出於官。而責足於民。有餘則總其事者私焉。公洩是役。撙節浮蠹。還其餘錢。爭驩呼而去。奸民以僞鈔鉤結黨。與脅攘人財。官若吏聽其謀。挾之以往鄰境諸縣。株連所及。民之破產者數百家。府俾公鞠治。官吏除名。同謀者各杖之百。捕盜卒陰寘僞鈔板於良民家。乃白於官往索之。惡少年持挺從者幾百人。公遇諸野。詰僂人曰。弓卒額止三十。安得此曹耶。可縛送於州。皆相率遁去。有盜繫錢塘縣獄。遊民賂獄吏私縱之。假署文牒。發兵來爲之鄉導。逮捕二十餘家。公疑而訊焉。悉得其情。以正盜宜從重議。持僞文書來者。又非州民。俱械送錢塘。誣者自明。奉省檄監稅杭州。僅三閱月。增羨錢十二萬緡。至順二年。用馬文貞公之薦。召爲應奉翰林文字。同知制誥。兼國史院編修官。進階儒林郎。扈從至開平。作紀行詩十有二篇。世盛

傳之。丁外憂去官。服闋。轉承直郎。國子博士。未始以師道自居。輕納人拜。所親厚者。業成而仕。皆有聞于時。時欲移禮殿四配位。東坐西嚮。學官或議分置於左右。同列不敢爭。公獨面折之。其人恚甚。日坐堂上。以危言相加。御史斥其無禮。乃竟如公言。居六年。請補外。換奉政大夫。江瀚等處儒學提舉。年六十有七。不俟引年。亟上納祿之請。俄有旨募修遼金宋史。丁內憂不赴。服除。以中順大夫祕書少監致仕。居四年。中書右丞朶爾直班公。今中書左丞相太平公力薦之。命落致仕。仍舊階。拜翰林直學士。知制誥。同修國史。至正七年六月。至上京。中書傳旨兼經筵官。召見慈仁殿。上語朶爾直班曰。文臣年老。正宜在朕左右。八年夏。升侍講學士。中奉大夫。知制誥。同修國史。同知經筵事。修后妃功臣傳。數被金幣之賜。上章求歸田里。不俟報而行。上聞之。遣使者追及武林驛。敦迫還職。十年夏。始得謝南還。江瀚丞相達世貼陸邇公。承制起公商議中書省事。以疾力辭。其薨也。士林爲之傷悼。所著文集三十三卷。義烏志七卷。筆記一卷。公娶王氏。累封江夏郡夫人。先一年卒。子男一人。梓也。杭州路同知海鹽州事。女一人。適惠州儒學正陳克讓。孫男四人。瑄。琛。瑋。珣。公天資介直。博極羣書。而約之於至精。有問經史疑難。古今因革。與夫制度名物之屬。旁引曲證。亶亶不能休。至於剖析異同。讞決是非。多儒先之所未發。見諸論著。壹根本乎六藝。而以羽翼聖道爲先務。然其爲體。布置謹嚴。援據精切。俯仰雍容。不大聲色。譬之澄湖不波。一碧萬頃。鼉鼉蛟龍。潛伏而不動。淵然之色。自不可犯。凡典冊詔令。銘述功德。多以命公。他求文者。日盈于門。力麾之而弗去。雖絕域殊邦。亦皆知所寶愛。性篤孝親。歿營冢域於三釜山。有乳虎訓狎之異。月旦望必展省。大暑

寒不易。先世遺文。歲久頗有殘缺。極力搜訪。補綴成編。在州縣清白自將。所至無圭田。鬻產以佐其費。在朝不事造請。逢覃官者一減資五者。銓曹或失於收叙。亦不自言。與人交無鉤距。不事矯飾。以爲容悅。而誠意獨懇至。然剛中少容。觸物或弦急。震一旋踵間。煦如陽春。曾不少留礙焉。素寡嗜欲。甫四十。卽獨榻處外。及登法從。蕭然不異布衣時。遇佳山水。則觴詠。終日忘去。世之議者。謂公操行孤潔。類陳履常。文辭嚴簡。類王介甫。筆札俊逸。類薛嗣通。第非真知者。未數數然也。銘曰。

黃出春申。著于金華。或徙豫章。蔚乎名家。定居烏傷。當宋中世。故笏有傳。在其來裔。仁宗御極。拔擢俊英。公起南土。對策明廷。精敏之才。小試州縣。供奉詞林。陶鑄時彥。迺振文鐸。蚤懸其車。召還經幄。載筆石渠。皇眷甚隆。官情彌薄。掛冠歸休。翱翔寥廓。維昔文節。學行允臧。代序雖遠。聲華相望。老成淪亡。公則著蔡。文獻之承。來者攸賴。八情考終。是爲歸全。述銘耆德。東塾之阡。中奉大夫。參議中書省事。兼經筵官。臨川危素撰。

請諡文移

太常博士傅亨。嘗謂天啟文明之運。時生純德之賢。擅一代之文章。爲諸儒之軌範。既有功於名教。宜加贈以褒崇。竊見故翰林侍講學士中奉大夫同知制誥兼修國史同知經筵事黃潛。天資端介。德操剛方。早擢秀於翰林。遂登名於科第。初任將仕郎寧海縣丞。陞從事郎。諸暨判官。擢儒林郎。翰林應奉。除承直郎。國子博士。遷奉政大夫。江瀾儒學提舉。不俟引年。自行致仕。授中順大夫。祕書少監。居閑未久。今上以

史事特召爲翰林直學士兼經筵官未幾陞中奉大夫侍講學士同知經筵事屢蒙召見殿庭賜以樽酒金織紋段寵遇優渥蹟公之筮仕州縣則民庶懷德而詠仁入教成均則士類樂育而從化至於供奉翰苑職典祕書侍講讀多獻納之功知經筵有規諫之益三考鄉薦於行省繼知貢舉於會闈主文旣公得士爲盛言性理探程朱之奧妙論著述繼韓柳之雄深德業昭著文章炳煥太極一賦爲治朝之大雅古文諸作垂奕世之弘規四方學者覩之若星鳳仰之若山斗年旣老耄優游鄉里文墨自娛多所撰述至正十七年冬十二月翰林修撰曾堅出使江浙還言本職已於是年閏九月初五日病終於家享以匪材親侍几杖詩書之澤久承指受道德之腴每霑膏馥知其博極天下之書洞達古今之制爲縉紳所推許爲學者之依歸如蒙轉呈移文合於部令此依翰林侍講學士袁桷鄧文原例依上褒封贈諡仍行翰林國史院爲之立傳甚愜公議今將翰林國史院編修官門人宋濂所撰行狀錄連在前合行移關請照驗轉呈施行

諡議

乾坤清淑之氣在上者爲日月星辰在下者爲山川草木賦於人者爲道德文章則又贊天地之化育歷萬古而不朽也皇元龍興朔方聖神繼作天下混一其賢才之盛興起一時以文章道德黼黻皇猷爲當世之儒宗者未嘗無人焉迺若故翰林侍講學士中奉大夫同知制誥兼修國史同知經筵事黃公負端介之資抱高遠之志早奮跡於儒科繼登名於法從試郡邑有惠愛之政教成均得養育之方其在翰林

屢蒙眷遇。掌絲綸而宏帝制。修紀傳而寓王法。其學術之精微。道德之崇邃。六經羣史。窮其淵源。諸子百氏。究其根柢。故我國家典冊詔令及勳賢碑銘。必命公爲之。海內冠帶之士。以至浮屠老氏之流。凡以文爲請者。歲無虛日。每出一篇。家傳人誦。書善真草。或得之者。不啻隨珠趙璧。其文章根本乎六經。而能羽翼乎聖人之道。謹嚴精密。紆徐而不煩。山高水深。金鏘玉戛。皆雍容自然。追配漢唐諸作。爲學者之模範。有元以來。其如公者。蓋不可多數也。天下學者。僉無間言。蹟公之行業。想公之儀刑。書之史冊。銘之泰常。允符公議。易名定諡。國有彝章。謹按諡法。博聞多見曰文。學該古訓曰獻。請諡曰文獻。前應奉翰林文字。承事郎。同知制誥。兼國史院編修官。新除文林郎。太常博士。傳亨謹議。

黃文獻公祠堂碑

星辰之昭乎上者。天之文。河嶽之列於下者。地之文。經緯乎兩間而不昭至道者。人之文。人之文雖若有不同。或得之者。亦足以配二儀而常存。後萬物而弗凋。蓋以長庚之精。峨眉之神。皆降而爲命世之神。所以能軋摩日月。扶植鴻化。以震盪乎一世。故雖其魄已喪。其神不亡。乘一氣於太虛間。鼓舞變化。隨雨露風霆而著形焉。尸而祝之。實有不得不然者矣。有若烏傷黃文獻公。其殆庶幾乎公之方姓。母夫人夢大星煜煜然墜於懷。及其生也。繡川之水。爲之一清。是蓋星靈川祥所融凝而成者。故公遂以文章鳴一時。侍講經筵。闡明聖學。掌宣皇制。黼黻太平。昭回雲漢之章。衣被乎草木。人文化成之效。於斯爲盛。是則公雖薨。而其耿耿不沒者。固將游神太清。在帝左右。而祠之不設。非甚缺典歟。濠梁胡侯。惟信來爲縣。剛明

正直不可干以私行之既久。政通人和。屢謁公之墓下。涼颺動木。悵然而有遐思。卽下令禁其樵採。復輯公之遺文。刻梓傳世。侯猶謂未足以交神明。乃請於上官。築祠於繡川之濱。堂庭穆如。門廡清謐。象設有嚴。丹雘焜耀。落成之日。侯具牲酒盛服致祭。公之孫子。邦之羣彥。咸從侯後。精誠格孚。契乎冲漠。焄蒿悽愴。如將見之。祭畢而燕。籩豆靜嘉。肴核維旅。鴻休誕昭。秩秩離離。四方之士。來游來瞻。僉以爲侯之爲政。知所風厲。而公之靈爽。永有攸棲矣。或者則曰。人死則其氣斯盡。古者祭鄉先生於社。不過崇德報功。爲人勸爾。子曰。其神不亡。無乃涉於誕耶。曰。嗚呼。是未知鬼神之情狀者也。世之強夫志士。用物精多。尙能昭著靈響。廟食百世。況鍾天地靈長之氣。而發爲文章之英者乎。其不隨世而磨滅者決矣。至若庸夫凡氓。其德不顯。其鬼不靈。則當如此言爾。初祠之成。同門友王君緯。旣爲紀其歲月。公之子梓。從子樓。從弟棟。謂侯是舉。有關於名教之重。而非私於一家。又請濂詳文其事於石。以昭侯之善。與此祠相爲終始。濂按春秋書事之法。辭有重複而不殺者。因竊取斯義而爲之記。復繫之以詩曰。

大星煜煜流光晶。川后斂淬若鏡澄。發爲五色文章英。上騎日月薄太清。呼吸雨露鞭風霆。在帝左右持文衡。交龍降升藻火明。生色燦爛丹鳳翎。萬物承被流華榮。一氣闔闢不可名。元功斂迹歸杳冥。其魄雖離神則形。炯炯直與元化并。有祠翼然妥幽靈。陽烏高竦聳觚稜。庭宇沕穆森巨楹。歲時奠祭輸精誠。牲脔肥腍酒潔馨。條陽忽陰誰使令。有神來下風泠泠。若乘元鱗紫霞駟。降爾百福響然憑。鄒魯禮樂當淳興。春秋報事垂千齡。門人同郡宋濂謹撰。

黃文獻公祠堂碑銘并序

古者君子出而任公卿之位。及其退處於鄉也。人稱之曰鄉先生。歿則相與立祠於社。尸而祝之。崇德美。敦化原也。嗚呼。若吾先師黃文獻公。所謂古之鄉先生者歟。公諱潛。字晉卿。世爲義烏人。登延祐乙卯進士第。歷官州縣。所至以廉能稱。入爲應奉翰林文字。遷國子博士。居六年。所教弟子。悉爲名人。除江浙等處儒學提舉。年未七十。卽納祿歸養。遂以中順大夫祕書少監致仕。家食久之。於是儒林宗工。日就凋謝。國家思用老成。落致仕。以翰林直學士起公於家。尋陞侍講學士。兼知經筵。復總裁國史。其居經筵。每進講。必陳仁義道德之說。在史館。筆削無所阿。凡朝廷大詔令。大制行。皆以屬於公。而公獨任斯文之重。爲海內所宗師矣。未幾。控辭而歸里居。又數年。至正丁酉。年八十一而薨。制贈中奉大夫。江西等處行中書省參知政事。護軍。江夏郡公。諡文獻。儒臣之榮。斯爲盛焉。今行中書省臣建議。謂公以精純之學。羽翼聖學。以典雅之文。黼黻人文。誠一代之儒宗。百世之師表。義烏乃其鄉邑。建祠致祭。於禮爲宜。下其事有司。先是縣令胡侯。旣哀公文集。鋟梓以傳。復因門人里生之請。方掄材度址。圖作祠事。而省牘適下。旣慨然以爲己任。擇吉壤繡湖之東。爲祠宇三楹。間而肖像其內。肅賓之軒。守祠之舍。列於左右。其外繚以崇墉。樹以名木。祠宇之所宜有者。靡或不具。歲癸卯正月甲辰。落成之年月日也。維宰臣分藩。鎮撫東土。德威並著。列城奠安。然敬故尊賢。尤爲先務。是祠之建。允合古誼。而縣大夫保有民社。政績昭彰。又能知爲政之要。汲汲焉祠事之是成。其於教道。誠爲有補。是宜勒辭麗牲之石。以紀其端原。若公之學術志行。揆諸

聖賢而無媿者。其詳所在。有行狀。有家乘。墓隧有碑銘。太常有謚議。國史有列傳。茲不復書。銘曰。山英川靈。孕氣淑清。鍾爲名賢。維公有作。顯顯文學。聞譽昭宣。其學之長。內聖外王。喬嶽澄淵。其文之精。玉振金聲。入神出天。用以名世。邦家之瑞。絕後光前。國有老成。是曰典型。當宁載延。文儒所職。金匱石室。廣廈細氈。控辭歸休。優游林邱。德義彌尊。卹典孔崇。于飾其終。光賁重泉。乃作祠宇。碩碩其礎。繡湖之壘。公像在堂。歲時烝嘗。率禮弗愆。道爲世師。人懷教思。有弗揭虔。勒辭焯德。垂示無斃。牲石是鑄。門人王樟謹撰。

祭黃侍講先生文

維至正十七年歲次丁酉。閏九月壬寅朔。越十有七日戊午。門人金涓、屠性、宋濂、王禕、朱濂、傅藻等。謹以清酌庶羞之奠。致祭於元故侍講修史先生黃公之靈。嗚呼。人物文章。有盛有衰。其所關繫。意者天則使然。非人力所能爲。昔在唐宋。韓歐之出。實當其盛時。時則劉柳蘇曾。相承並起。有以聳當世文治之巍巍。及其既沒。文章遂卑。而君子於此。亦以其驗世運之推移。惟國家之興隆。元氣混合。三光五嶽。結粹而凝輝。鍾爲人物。著於文章。律倡呂和。規重矩疊。莫或與之夷。然當至元大德之世。龐儒碩生。布列於朝廷者。大抵皆前代之遺。祖宗作人。爲日既久。逮乎延祐。設科取士。而得人之盛。遂及於今茲。公當其時。奮乎東南。哀然舉首。文名赫然而四馳。歷仕外服。晚乃登畿。典冑監。領儒臺。學者翕然而宗師。當代文章之柄。咸公是屬。而公亦不得以苟辭。肆今皇上。崇尚儒術。慨念老成。有足倚毗。幸公之獨在。爰起公於既老。用公

於未衰。掌制於玉堂。勸講經帷。任尊而職邇。將倚以爲王猷之黼黻。國論之蒼龜。天下仰之如韓歐。謂朝廷爲有人。士類爲有依。公不久留。控辭而歸。出處進退。卓然而無疵。公今沒矣。一代之人物文章。于是盡矣。非天其執使之。竊嘗論公學博而操則約。力宏而造則微。統壹聖真。融貫理奧。不大聲色。任斯道而委蛇。故其形於文章。譬如周廷重器。圭璧鼎敦。分置離列。蓄光彩而嚴等威。又如漢廷老吏。持法精謹。引經傳古。以斷獄而決疑。性靈以之而發舒。造化以之而補裨。聖賢經傳以之而羽翼。古今事理以之而綱維。公之名世者。人皆知其出此。抑所以致此者。固夫人之莫知。嗟公已不可復作。斯文之未喪者。幾希。昔歐陽子之歿也。臨川王公。以謂生有聞於當時。死有傳於後世。苟能如此足矣。而亦又何悲。今公之有以不朽。誠亦何憾。而吾黨小子。傷悼摧痛。不能已於言者。又眉山蘇公。所謂上爲天下慟。而下以哭吾私。曾日月之不居。屬大葬之有期。薄陳一奠。維以洩哀。嗚呼哀哉。尙饗。門人王禕撰。

送黃先生歸烏傷序

至正元年。國子先生黃公。提舉江浙儒學。迎侍母夫人來錢塘。時夫人年八十有六。兩嘗屈致板輿。游開元後圃。先生白髮儒衣冠。從子鶴雙舞導於前。婆娑花竹蔭映間。人皆望而羨之。未幾。夫人還義烏里第。先生居官甫踰二載。不俟引年。納祿而去。人又羨以爲不可及。於是上方用中書奏。妙柬文臣。付以史事。先生名在史官中。使者及門。而夫人之殯在堂已九日矣。比服闋。乃拜祕書少監致仕之命。初。先生官七品。先府君無恙。親受樂清縣尹之封。後五歲而沒。卜葬於秦孝子顏君墓北五里。蓋傍要離塚之遺意也。

夫人既合葬。先生遂廬於墓左。而爲壽藏於其旁。有乳虎往來。馴伏墓側。與人相狎。而不敢傷。數月乃去。蓋孝感所致云。五年冬。先生來錢塘。買石作先府君墓道之碑。碑之文若書篆。出於歐陽許張三公。皆先生同年也。碑事竟。載以東歸。學士大夫與凡從遊。以先生往日解印綬徑去。人不得而知。弗獲餞別。今咸欲爲詩送焉。以雨方外之遊。頗詳出處。俾鋪序於前。庶作者有以知其概。詩不徒爲也。承命而書。誼不得辭。同盟諸君。勿以敘詩爲僭。雖然。千秋故事。祕書監實於黃冠不外。兩故序而不疑者。以此。是歲十月。旣望。句曲外史張兩序。

送金華黃先生歸里序

古者大夫七十而致仕。則年未及者。禮所未許乎。況七十而去者。不得謝。而後有几杖安車之賜。今法大夫之去。不限七袞。則以有故如養疴侍親者是矣。然又必優加以爵秩。俾後之人語之以世。其進爲廷之侍臣。始終何其恩數之至哉。金華黃先生。提舉江浙儒學。年考未周。竟以致仕之義去。時於古之引年。猶未及也。蓋太夫人在里第。春秋且八十有六矣。此其去有義。官不得而留也。明年。朝廷以三史之事。遣使聘文墨老臣。先生實在聘中。而太夫人逝矣。以爲太夫人借無恙。先生其起乎。非也。夫先生以忠孝徇已。而又持以教人。事親孝。故忠可移於君。忠孝本非二道也。至聞先生廬親之慕。於顏孝子塚傍五里所。與乳虎狎於廬南。此非至孝之感天。而能動物之不仁者。不能如是也。故觀先生之孝。而知先生之去爲可詠。不以其輕祿於未及之年也。服旣闋。中書以致仕故事。升高秩祕書少監。嗣某得以八品入官。先生終

老於家。眡文獻之相禪。穀祿之相仍。與一二同志仕而休者。不在山南。卽在水北。胥來胥會。以樂其餘齡。於太平之世。非事之至盛者乎。惜余尙以升斗之食。去其故鄉。而未遑追先生後也。爲之慨然。時至正五年冬十月二十三日。會稽楊維禎書。

送黃先生歸烏傷後序

科舉初行。金華黃先生爲鄉里所強。薦試於有司。旣領鄉薦。上春官。對策於大廷。在濟南張君夢臣榜。賜同進士出身。宦遊三十有三年。始以祕書少監致仕。當時同年與後進者。出入侍從。赫然居臺閣。富且貴。而先生方食貧索居。與未仕時無少異。或者謂先生亦漫爲遊者歟。蓋先生性廉靜。寡嗜慾。薄名宦。故所處恬然。亦無不自足者。而凡所至止。四方賢士大夫與方外之友。踵門而來求。所謂公堂廳壁園池亭軒寺觀塔廟祠宇阡壠。以至於前人法書名畫。謂得先生之文。凡官有善政。士有隱德。泯滅而無聞者。遂得託聲光於不朽。而有所取信於世。其見欣慕於人者如此。先生旣去官之明年。居母憂且終制。今年秋八月。攜子來錢塘。買石刻先君子太常府君并母夫人墓誌銘。因得訪故舊親戚。而門生故吏來謁見。賀先生之懸車致事。又賀當臈子可得官八品。願且留湖山間。筍輿桂楫。巖阿澗曲。可以盤桓。而四方之人。不以賢否。又不擇其不可。聞風而來。雜然請爲文章者。殆無虛日。先生峻辭拒之勿去。繼之以怒亦弗退。因輒治行。將歸金華。未戒行。而吳興之高士逸人。已造舟久待於西湖之濱。將邀先生遊計。籌何山之間矣。業已治行。其去與留。而先生初無固必。又豈所謂漫遊者歟。郡之士人。旣賦歌詩爲餞。而先生之門人。

俾走爲後序。不得辭。遂以序於後。以補張君伯雨前書之所未書者云。東里陳元英書。

寄柳道傳黃晉卿兩生方 鳳

大火且西逝。赫曦詎能爲。叢竹覆孤館。綠陰相蔽虧。人散衆喧寂。獨鳥嚶鳴隨。想見探討餘。層層發新知。儻不鄙朽拙。勉哉勤相遺。

太樸散已久。鴻甄疑未均。惟有砥礪志。搜剝得其純。勿以珪璋質。頑石實勿陳。君攬國香蕊。每與荆棘隣。荆棘豈不刺。反以揚素塵。

盈盈黃菊叢。栽培費時日。依依五絲瓜。引蔓牆籬出。于今想新花。于今長秋實。花實豈不時。灌溉尙期密。毋令根菱傷。委棄等藜莠。

新秋涼氣發。松籟調于喁。山房良靜閨。文史淡足娛。吾心太虛廓。儻然萬象俱。大觀物物齊。何事分賢愚。遐哉金蘭契。聊用佈區區。

艸堂琳藏主得往年黃晉卿吳正傳張子長北山紀遊八詩裝演成卷要予繼作因追敘舊遊爲次

其韻增諸卷軸 柳 賈

靈源

禪堂生莫寒。客至不成宿。巖雲忽飛墮。深燈出他屋。仰見星斗高。闌干轉空曲。

草堂

半隄純浸山。山空時見景。老禪行道處。水木餘凄冷。文字豈其機。無言坐移頃。

三洞

高高三洞門。中天開積翠。陰火發晶爨。坤珍扶奇闕。仙靈倘下來。歸吾此焉遲。

鹿田

塵飛天宇空。石破巖泉古。萎花吹微香。林端夜來雨。語客莫題詩。山靈忌多取。

寶峯

到寺取徑危。穿林限沮洳。井氣升爲雲。篁作高於樹。清風翼我興。納履下山去。

潛岳

德人久歸泉。何異舟藏壑。僧廬出櫺翳。楹桷亦頽落。回望芙蓉城。雜花香漠漠。

山橋

言尋磊磊亭。躡雲隨下上。澗回洄微流。山空答遙響。我已後斯人。寥哉得其賞。

寶石

餘春不可挽。風花吹滿路。向來一宿覺。寤語知其處。卻望北山南。城深晝多霧。

與晉卿夜坐道舊因書贈別

去歲離京秋葉黃。客間看客又新霜。澄江不礙游雲影。寒月空驚過雁行。文苑卽今誰醞藉。宦途何許是

康莊。紅顏青鬢非前日。卻愧人稱兩驢驢。

得晉卿博士自京寄書道左轄王公參議韓公存省顧問之意

朔雪乾時一雁征。遙傳書札到柴荆。自投瘠土從耕牧。幾辱平津問姓名。白月寥寥虛近映。青山寂寂動餘榮。果然不負丹砂諾。熏校吾將謝墨卿。

黃晉卿提舉授官初歸。予偕敬叔輕行訪之。假榻湖邊。滿心僧院。明日病作。敬叔先還。予留就醫藥。數日乃歸。予少時嘗聽琴此院。今四十年矣。柳貫

湖濱僧齋聽琴筑。間四十年來不速。秀眉一衲今雪顛。迎門坐窗煮茶熟。自敲竹檻喚童歸。更拂藜床延客宿。客方病起氣如絲。夜枕欹眠屢驚觸。晨興體惡頭岑岑。三日忘飡不思粥。歸者先歸留者留。賴是吾生耐幽獨。瘦茶猶資藥餌扶。過存厚謝親朋辱。陰陽致寇孰乘之。小待神完理當復。行藏一迹太累人。畏影偏教影相逐。莫途久冥折腰具。高誼能忘軟脚局。湖山款款惜重違。雨色雲容看未足。寧能將此不貲身。坐耗齋廚兩囊粟。鶴背西風去意輕。命僕肩輿催結束。

和黃晉卿北山紀遊韻吳師道

三洞金華北。蒼蒼夾徑松。瀉空噴百澗。拔地立千峯。林石欹還整。巖梯絕復通。向田瑤草碧。隱樹晚花紅。嵌竇推舟入。椒庭載酒從。洗觥忙羽士。捧研喜山童。陟嶺驚逾峻。沿流竟莫窮。千年杏仙鹿。兩寺互僧鐘。壁裂森開峽。傳聞舊化龍。轉蓬奔雪浪。榮早卻玲瓏。水際朱藤蔭。巖阿青桂叢。亭荒餘磊磊。雲出正濛濛。

蘭若知何許。芙蓉復在東。五盤隨屈曲。一路聽琤琮。山斷俄爲野。湍平不見空。暮房深榻靜。朝磬小樓重。傳玩遺髹鉢。興嗟對殯宮。拂衣登嶺去。穿棘少人逢。飛殿仍遙峙。重關故不封。歸尋草堂卷。坐戀水軒風。兩紀三人合。相看一笑中。孤踪忻影逐。薄技愧才雄。別袂分殘雨。衡門翳野蓬。後游寧未卜。思劇謾憧憧。

和黃晉卿吳師道

一壑風煙自可留。十年湖海漫曾遊。短衣射虎真堪樂。莫憾將軍老不侯。

送黃晉卿先生東歸錢塘廬 本

江空歲晚水天低。婺女芒寒映壁奎。猶想白雲飛丙舍。又隨明月過雙溪。龜趺制古螭蟠首。黃絹辭工白受齋。祇恐蒲輪徵召起。未容夫子在關西。

天台王景順

先生忠孝信無雙。況復文章萬丈光。繡水幾灣瞻翠竹。暨陽三載頌甘棠。姓名曾著黃金榜。翰墨宜盛白玉堂。綵服養親情莫奪。老年廬墓近烏傷。

震城王 忠

當年一舉占鰲頭。平步青雲志已酬。解印似嫌官職顯。歸田欲慰母心憂。湖山鶴去官梅老。霜月烏啼宰木秋。願我愚蒙生太晚。抱經何日從公遊。

潤州堵 簡

車蓋歸來雙鬢皤。野雲泉石炤婆娑。碧山學士秋蘭佩。錦里先生白玉珂。鶴舞階前修竹近。虎眠林下落
花多。相思不少東都客。應有新題遍澗阿。

楚郡葉 森

詔使催徵赴石渠。翩然拜疏乞閑居。東陽山水人才盛。西漢文章筆力餘。一代聲華凌白日。百年心事徹
清虛。門生袞袞傳衣鉢。看從蒲輪過里閭。
麻衣高揖謝儒紳。石室徒勞遣使臣。前史任歸他學士。後喪禮盡太夫人。義均塚上瞻烏止。孝感山中乳
虎馴。未許鴻名終閣老。行看黃髮賜蒲輪。

四明姚安道

先生歸老芸香閣。昔日曾抽金匱書。宣室何時還賈誼。上林有賦憶相如。一尊春雨同誰酌。三徑秋風或
自鋤。欲繼襄陽傳耆舊。道傍多少故人車。

武林錢惟善

解綬東歸庭樹秋。大夫人在木蘭舟。清晨文字五千卷。明月溪山十二樓。使者方傳金馬召。先生已伴赤
松遊。賀家湖上花如錦。幾欲移居過越州。

吳郡楊 彝

祕監承恩及掛冠。金華歸老得盤桓。賀公湖上千秋觀。白傅山中八節灘。久望門牆成間闊。幸陪杖履臨

帆幟。人生會面真能幾。獨覺臨江送別難。

彭城劉儼

霄漢池書聘使臣。鄉閭歸老得閑身。舊時供奉班中客。今日耆英會裏人。栗里黃花三徑晚。錦坊紅杏午樓春。聲華一代還堪羨。欲就延康託近鄰。

錢塘何慶餘

雄才超卓異羣公。一代風流道可宗。戀闕自膺丹鳳渥。還山誰問石羊蹤。辭精韓柳傳當世。歲老松椿隱別峯。聖主懷賢閑未許。天書又出紫泥封。

虎林張世華

祕書少監黃夫子。早沐清光表縉紳。丹闕受恩朝聖主。白頭辭祿奉慈親。歸來松菊開三徑。老去文章挽萬鈞。珍重先生爲我記。華門高蔭藹餘春。

浦城章迪

祕監文章老更奇。君門射策數當時。官聯固獨存儒行。祿養猶能及母慈。往事不操陳壽筆。舊遊還過伍員祠。歸舟又逐寒潮發。祇載前人塚上碑。

會稽韓文璜

先生提學南州日。白髮衣冠從板輿。田里已終慈母養。墓碑遠乞故人書。維舟江浦烟光晚。送酒河梁樹

影疎聞道金華歸隱處。還同賀老鑑湖居。
先生有道賦歸來。弈弈金華紫翠開。太極賦成遊月窟。天門詔下擢蘭臺。山中稅駕文鷄起。江上看碑綵鷁催。祇恐故園高隱後。安車束帛降蓬萊。

桐江俞和

東觀承恩鬢已皤。拂衣歸臥北山阿。靈臺漸覺文星遠。史館曾勞使者過。回首遙瞻丹鳳闕。行舟穩泛白鷗波。巋然先壠豐碑樹。應是門人廢蓼莪。

送黃晉卿先生東歸宗弟玠

惟我宗人兄。早登南京試。當時太極賦。可使紙價貴。文章有餘勇。一鼓作士氣。旋收成均譽。遂發蘭臺秘。迎親來遠遊。祿仕見初志。懸車不及挽。重是愛日意。桓楹對阡表。彝鼎銘祭器。哀榮兩無歎。子道茲益備。昔往幾莫追。今歸復何亟。江皇冠蓋集。潮水舟楫駛。能無英瓊瑤。持用答嘉惠。回首望金華。草木亦增賁。

次黃侍講贈陳性初詩韻宋濂

憶昔遊虎林。年壯已非冠。旅食嘆酸辛。敢望諸侯傳。捉衿肘已露。納履踵成穿。甘從原思貧。恥學毛遂薦。麴荇丹邱生。文采超衆彥。精魄更蔚靡。雖展垂天翰。每逢羅浮春。含笑解貂換。列飲杏花陰。吹笛侑羹獻。微酣雙耳熱。欲議層疊見。宏深劇王霸。險詭雜神幻。踏月或起舞。留連過夜半。恆思酒星臨。手不離壁散。忽騎東海鯨。歸餐赤城飯。于時海大魚。鼓鬣正湍悍。颶風挾洪濤。漂沒無畔岸。手操丈二矛。欲刺忘身賤。

指麾集羣漁。蓐食待東旦。更陳清海策。銜袖書一卷。大言驚衆聽。讀者治背汗。九關不可通。志士徒扼腕。因作山水游。所幸脚力健。酒經七家箋。詩囊五采爛。走馬過粵郊。看花人荆甸。醉餘兩齒豁。雙鸚傷一箭。湘流去洗耳。杳不聞治亂。自予湖隄別。久矣蹤跡判。秦淮詫再聚。何異鍼得線。示我諸遺篇。令人憶東觀。襄陽耆舊亡。文園白日晏。襲之如殷彝。夙夜宜繕繕。

性初余同門友。至正初定交。錢唐及茲兩紀。頃以先師黃文獻公所贈詩見示。感今念昔。撫卷泫然。

因次韻追和王 律

憶昔與子游。我齒始踰冠。子年頗少我。已復飽經傳。白璧信少雙。明珠合同穿。吾師文獻公。清慎寡推薦。而獨敬愛子。揄揚儕衆彥。庶將託斯文。豈特誇詞翰。緬思韓公門。至者凡骨換。其時籍湜輩。抱璞爭自獻。何言百世下。徽猷乃重見。寥寥古道遠。忽忽陳迹幻。我時事遠游。歷攬天下半。三年客幽燕。坐使黃金散。卻歸巖穴底。還覓青精飯。惟子負奇才。年長氣逾悍。不受世鞅羈。歸釣東海岸。誓終究遺經。世累忘貴賤。蛟鱗者何爲。騰窺起清旦。誰云屠手龍。祇解挾書卷。揮劍刺其鬣。腥雨灑流汗。終然雖裂背。竟爾成解腕。遠害圖全身。有足奔走健。自茲十年來。宇內皆糜爛。我猶陞故園。子乃處遐甸。蹤跡無由聞。頗類弦離箭。及是重盍簪。各詫經喪亂。故業共討論。殊覺賢否判。子才雲錦機。組織五色線。待詔金鑾坡。講經白虎觀。此事誠所優。吾將迫衰晏。遡風一泫然。徒有情繕繕。

次侍講先生游方巖韻王 律

靈迹初開不記年。危峯如削路如懸。尊聞匹馬臨池飲。恐有羣羊化石眠。風引珮聲來上界。雨連香氣落中天。昌黎亦有衡山謁。今古清游豈浪然。

陪黃先生至東陽謁胡先生有詩次韻王 禕

壯游回首各成翁。猶憶當年共際逢。二老往來看鶴髮。十年先後對鰲峯。由來元白名相並。歸去疏楊跡更重。莫道山林足忘世。只今海內仰儒宗。

今代文名屬兩翁。況兼出處每相逢。秋風官馬灤陽道。春日肩輿峴首峯。酒盡未空渾覺醉。羅衣初試已嫌重。多應杖屨從容地。前輩風流得共宗。

壬辰春陪侍講黃公太傅胡公及諸友飲於趙園分韻得林字李 唐

逶迤翠峴籠。曲密雲圃深。煙蘿拂危石。野樹鳴幽禽。侍飲文章伯。燕坐松竹林。高風振虛籟。末席分清陰。雅詠亦閒發。嘉言心所欽。豈無多聞友。及此欣盍簪。拾韻託餘響。浩歌豁煩襟。

跋胡方柳黃四公遺墨後宋 濂

右鄉先生手帖四紙。前二帖。則修道先生胡公汲仲。巖南先生方公韶卿。與海溪傅君者也。後二帖。則柳文肅公道傳。黃文獻公晉卿。與初齋王君者也。巖南有異才。常游杭都。盡交天下知名士。將作監丞方洪奇其文。以族子任試國子監。舉上禮部。不中第。會天下多故。三以策告丞相陳宣中。不聽。後以特恩授容州文學。未上而宋籙已訖。終身思宋。一飯不能忘。每語及之。輒涕泗交頤。世稱爲節義之士。胡公實巖南

至交。而柳黃二公皆其門人。是三君子者。其學行已載元史。人咸得聞之。唯巖南不出仕。世之知者或寡。故濂特加詳焉。梅溪諱光龍。字子才。時爲嘉興路教授。仕至福州侯官主簿。以終。初齋望良玉。懷璞其字。衢州常山縣教諭。今翰林待制樟之父也。初齋乃梅溪之甥。金華俞恂。又初齋之外孫。其簡牘流傳。蓋有所自云。恂來學經於濂。以濂常及灑掃柳黃二公之門。裝褫成卷。俾題其後。義不敢辭。

跋黃文獻公送鄭檢序後宋濂

自古師弟子間。不趨親父子。然傳所爲父生之。師教之。其義誠一也。故孔子之稱顏子。則曰視吾猶父。是顏子以父事孔子矣。父子之道。天性也。父沒而手澤存焉。子或見之。則泣下霑襟。父師一也。孰謂爲弟子者有不然者。予友太常博士鄭君仲舒。黃文獻公之高弟也。公懸車家食之時。仲舒以外艱服除。復入經筵。爲檢討官。瀕行。公造序橐一通。親加竄改。持至浦陽江上。與仲舒言別。且致餼焉。仲舒既屬繕書者入卷。乃收序橐。祕藏惟謹。及公薨。裝成軸。每出展玩。曰。公吾父師也。公不可見矣。見公之手澤。如見公焉。言訖。輒悵然遐思。嗚呼。仲舒之不忘公。其盡師弟子之義者哉。仲舒。義門八世孫。家教薰洽。在家爲佳子弟。出仕爲名師儒。與仲舒游者。見其溫恭可近。輒自詫春風和氣之襲人。臨川太樸危公。稱南冠而北仕者。以德行之。當推仲舒爲第一流。觀仲舒不忘其師如是。餘則從可知矣。太樸之言。其真足徵哉。予亦灑掃公門。與仲舒爲同志。因相與一言之。

題黃文獻公紀行詩後

至順二年。予與晉卿爲太史。屬行。上覽山川之形勢。宮闕之壯麗。雲烟草木之變化。輒低徊顧戀。若有沈思者。余因知其賦矣。旣而果得其紀行詩若干篇。古者諸侯卿大夫。交接鄰國。以微言相感。必稱詩以諭其志。蓋以別賢不肖而觀盛衰焉。今天下一家。朝野清晏。士多材智深美。非宜著於文辭。曷以表其所蘊乎。晉卿宋故儒家。自應鄉薦。以太極賦知名海內。困於州縣幾二十年。今樞密馬公在中書日。始自選調。跋置史館。未幾。丁外艱去官。昔歐陽子以梅聖俞身窮而詩愈工。嘗曰。世謂詩人少達而多窮。蓋非詩能窮人。窮者而後工也。晉卿之詩。緒密而思清。豈天固欲窮之俾工其詞耶。趙郡蘇天爵書。

文獻黃公別錄跋

別錄文獻黃公集者何。憲副張夏山也。其意則黃門李潛厓侍御虞東厓耳。所錄者何。潛溪宋學士之所校。圭山張僉憲之所刪也。中若制詞等篇。當列諸首簡。其他雖多釋氏語。迺時之所崇。間有受君命作者。或曰。富哉初稿。餘無錄者何。夫文也者。文也。傳其所可傳。則人必尙。矧潛溪之校嚴矣。餘奚庸。圭山之編正矣。制詞之外。雖無錄可。然而讀圭山之編集者。知黃公之正。讀夏山之別錄。知黃公之大。故無別錄則不見全書。無全書則不見全人。夏山其潛溪之用心乎。賜進士第任福建興化府知府邑人葉觀書。

書黃文獻集別刻後

黃文獻集之初刻也。虞巡按惟明。屬張僉憲存禮校之。凡涉異教者削去。謂公知道者宜不爲此。惟明旣不滿志。李司諫九臯見之。寓書惟明。併屬大輪曰。必刻之。安知公之作。非不得已。則意有在耶。大輪躍曰。

信哉。公生不逢時。當元入主中國。天下且臣之矣。公之作其不得已乎。乃其志則可悲耳。抑曾子固有言。君子之禁邪說。固將明其道於天下。使當世皆知其說之不可從。然後以禁則齊。使後世皆知其說之不可爲。然後以戒則明。公之意其在茲乎。其在茲乎。遂手次爲二卷。付興化葉守國光刻之。國光公邑人也。福建按察司副使東陽張大輪撰。

重刊黃文獻公文集跋

黃文獻公爲有元一代巨儒。史稱有文集三十三卷。而日損齋稿。刻於公薨後五年。門人宋文憲公爲之序。只二十五卷。迨乾隆年間。浙江採集遺書。得元刊本。只稱二十三卷。蓋當時崇尚佛教。不無奉勅諸作。或編訂時有所刪減耳。其板在前明時已經散佚。嘉靖九年。侍御虞公守愚。重刊於閩。屬副憲張公儉訂定。將老釋碑版。盡行刊去。分爲十卷。維時同邑司諫李公鶴鳴。移書虞張。謂其不應去取。勸爲增刻。今惟見張公大輪。葉公國光。別刻跋語。而所增刻之二卷。久無傳焉。邑中惟虞張所定十卷舊本。尙有存者。然編次參錯。誠如嘉定錢竹汀養新錄所云。以意刪削。春風亭筆記別爲一卷。雜入文集。次第紊亂。尤爲可憎者也。且其板久殘。後雖經裔孫字景韓者補修。至今又缺蝕過半。不數年。將此僅存殘本。亦不可得而見。當時所稱澄湖不波。一碧萬頃。後人將何從而沾旣乎。心竊用是懷懷。而浮沈遠宦。耄及始歸。見其族較昔更盛。因與英俊者。亟言之。欣然歛資命匠。卽以校訂事相囑。遂爲釐正篇次。補對訛漏。刻將成。適陳君西橋自彝陵守卸事回。知其於前人著作。向能悉心搜錄。就訪之。遂出其所藏佚篇。及他名人題跋。裒爲附錄一卷。又曾於筆記。細爲攷證。茲別作一卷。附刊集後。雖不能完文獻公自訂全稿之舊。而根本六藝羽翼聖教之大凡。略具於此。謂非文獻公之靈。有以呵護而撮合之耶。刻成。爰誌數語於簡末。

咸豐元年孟夏望後。

同里後學陳 坡敬跋。

舊跋

古人著書立說。必本天所賦之正理。發爲文章。故歷久而彌新。永存而不敝者。以世有任修明之責者也。若我祖文獻公著述等身。雖一家之言。而生平道德事功。悉本於太極一賦。以故自元迄今。四方諸君子。其以葛文康酒券來假讀者。踵相接也。顧屢經兵燹之餘。苦乏善本。向以殘刻漫付劊劊。一時亟於告竣。以亥豕相仍。魯魚莫辨。雖識者賞鑒。自有得於意言之表。而瑕類猶存。終累全璧。昔先君子嘗有志較正而未逮。旣而病革。獨手授是集。丁寧囑曰。正訛訂譌。此兒曹責也。汝其善成吾志。可告無罪於先人矣。受命以來。夙夜戰兢。惟弗克光昭遺集。是懼。茲幸家難旣平。爰簡方策。躬親較讎。其可解者。以解解之。不可解者。以不解解之。不敢全憑臆見。妄爲竄改。其訛謬間有存什一於千百者。所謂小處糊突。大處不糊突也。至餘稿尙富。旣經鄉先賢暨賢邑侯選輯。勒爲成書。未敢遽壽梨棗。非謂令人因國門而思名山也。夫時不能有盛而無衰。事不能有得而無失。安知歷世旣久。不有視爲斷簡殘編。任其剝落漶漫而莫之惜者。興言及此。能無撫卷太息。重以修明之責。大有望於吾宗繼起之賢嗣也哉。是爲跋。

雍正六年歲次戊申。第十世孫之琦謹識於愛吾廬。

後序

剛也不敏。獲受經於宋太史先生之門。研窮義理之餘。先生出一編書示剛曰。此黃文獻公之所著筆記也。公於天下之書無不讀。而要之於至理。閒嘗侍函丈。共讀新修宋史。無一傳無訛者。非官制地理。卽歲月事實。甚至連氏名。亦或舛誤。觀公辨駁之精若此。則其平昔攷古之學爲何如哉。覽此記之大略。蓋已知之矣。雖中有一二條。摘書其事而不真。品評似若無所繫者。而洪文敏公作容齋五筆。凡四十七卷。亦往往有如此者。或公別自有見。今不敢略去。汝其受而藏之。剛退而伏讀焉。見其文婉而義深。諱玩日不釋手。初公之爲此書。隨筆而錄。未及詮次。剛因忘其僭躐。以類相從。分而爲三。曰辨經。曰辨史。曰雜辨。旣已繕書成卷。又以讀其書者。不可不詳知公之爲人。遂以中書參議危公太僕所撰神道碑。及太常博士傅公子通定謚等文。以附其後。共爲一書。夫雜著之有其書尙矣。自漢以下。各統萃羣見而發一義。故博雅可觀者衆。至唐而纂述者爲尤盛。惜乎多雜於龐誕虛誕。而閭巷淫褻荒穢不經之語。亦廁其中。而大雅君子有所不道。逮宋而文奎啓宿。諸老奮興。見於論述。灼可以詔後學而傳來世。若陳后山之談叢。沈存中之筆談。宋次道之春明退朝錄。孫君孚之談圃。洪景盧之隨筆。史慶長之學齋佔畢。或發明經中奧旨。或紀事足以補史氏之闕逸。嗚呼盛哉。公之此書。蓋可與之並傳者也。公之所著有詩文三十三卷。義烏志七卷。並以刻梓流布於士林間。而筆記獨未遠行。乃命工而刊之于梓。功告完。遂以平昔所聞次第。

序之於末簡。至於是書。所以有功於學者。先生於前序中已備論之矣。里後學瀟漢劉剛再拜謹書。

